



BUKU PANGAJARI PARGURU MALUA HKBP



PARGODUNGAN.ORG
Kabar Baik bagi Semua Orang



BUKU PANGAJARI
PARGURU MALUA
HKBP

HATA PATUJOLO

On ma buku na imbaru sipangkeon ni angka parguru manghatindanghon haporseaon di Huria Kristen Batak Protestan. Nungan leleng na so adong buku sisongon di Hurianta.

Ia buku on, on ma na pinatomutomu ni sada komisi na pinilit ni Rapot Praeses dohot Rapot Parhalado Pusat HKBP. Tarleleng do asa sidung buku on, ala ndang somal hita patupa buku na songon on.

Diuji do papungupunguhon angka parbinotoan sian Hata ni Debata, dohot poda na patut sibotoon ni sude na gabe Ruas na gok di Huria Kristen Batak Protestan.

Naeng ma tangkas diboto jala diantusi sude na marguru manghatindanghon haporseaon di Huria Kristen Batak Protestan, jala angka na ringkot siapilon diapil, asa boi hatahonna nang so jolo dijaha be sian buku. Apala na umarga, naeng dipasomalsomal sude mangulahon dohot mamarangehon na diajarhon jala dipodahon di buku on.

Mamboan pasupasu do i tu hamu di ngolumuna, jala mangalehon bisuk dohot gogo do i di hamu mananda dohot mangalo nasa utiutian ni Sibolis i, asa hot hamu mardalan di hasintongan jala sahat tu hangoluan salelenglelengna. Amen.

Laos dison pinasahat godang hamauliateon tu sude na masuk tu komisi, na manghalojahon patomutomu buku on. Sai dipasupasu Tuhanta ma buku on mamboan pasupasu tu sude Hurianta.

Ephorus HKBP

HATA PATUJOLO	3
HATA NI DEBATA.....	6
PATIK NI DEBATA.....	10
PATIK PARJOLO	16
PATIK PADUAHON.....	18
PATIK PATOLUHON.....	20
PATIK PAOPATHON	23
PATIK PALIMAHON.....	26
PATIK PAONOMHON	29
PATIK PAPITUHON.....	31
PATIK PAUALUHON	34
PATIK PASIAHON	37
PATIK PASAMPULUHON	39
PANDOK NI DEBATA TARINGOT TU PATIK NA SAMPULU I.....	40
HATA HAPORSEON NI HALAK KRISTEN	42
TANGIANG NA NIAJARHON NI TUHAN JESUS	66
SIPANGIDON PARJOLO.....	74
SIPANGIDON PADUAHON	75
SIPANGIDON PATOLUHON	76
SIPANGIDON PAOPATHON.....	77
SIPANGIDON PALIMAHON	79
SIPANGIDON PAONOMHON.....	80
SIPANGIDON PAPITUHON	80
UJUNG NI TANGIANG I.....	81
ULAON NA BADIA.....	83
PANDIDION NA BADIA.....	86
PARPADANAN NA BADIA	93
HURIA.....	99
PANGUJUNGI	109

paragodungan.org

paragodunggan.org

HATA NI DEBATA

SUNGKUNSUNGKUN DOHOT ALUS TARINGOT TU HATA NI DEBATA

1. a. Di dia hea dibege ho Hata ni Debata?
b. Ringkot do begeon Hata ni Debata? Ringkot do i jahaon?
c. Beha do roham molo dibege ho i?
d. Ingkon beha do rohanta umbege dohot manjaha hata ni Debata?
e. Dia do parasinganna sian na umbege dohot manjaha hata ni jolma?
2. Antong aha do Hata ni Debata?
Alus : Hata na pinaboa ni Debata tu jolma manisia marhite angka panurirang, dung i marhite AnakNa Tuhan Jesus Kristus dohot angka ApostelNa.
3. Ise do na manurathon Hata ni Debata dohot na mangonjar nasida manurathonsa?
Alus : Angka jolma na badia do na manurathonsa, na nionjar Tondi Porbadia.
4. Di dia disurat nasida Hata ni Debata?
Alus : Di buku 'Bibel'.
5. Sian dia do taboto na tutu do Hata ni Debata na tarsurat di Bibel i?
Alus : Sian hasasaut ni bagabaga na dibagasanna dohot sian panghorhon ni hata i dibagasan rohanta dohot torop jolma.
Jaha : Rom 1:16; 1 Kor. 1:18; Heb. 4:12
6. Aha do guna ni Bibel i jahaonta?
Alus:
 - a. Asa patar hadirion ni Debata Ama, Anak dohot Tondi Porbadia tu hita.
Jaha : Joh. 17:13
 - b. Asa taruli di haluaon marhite panghaporseaion di Jesus Kristus.
 - c. Asa taruli hita muse di panogunoguan ni Debata di bagasan hatigoran.
Jaha : 2 Tim. 3:15-17
 - d. Asa taboto marparange na denggan. Jaha : Poda 3:4-7
7. Dia dope goar na asing Bibel i?
Alus:
 - a. 'Hata ni Debata' do digoar Buku I, ala disi tarsurat na nidok ni Debata.
 - b. 'Surat na Badia', ala jolma na badia do na manurathonsa jala hata na badia do na pinaboana.

- c. 'Testament', na marlapatan 'padan', ala disi do tarsurat padan dohot bagabaga ni Debata laho paluahon hita jolma manisia.
8. Piga bagian bolon do buku Bibel manang Testament i?
Alus : Dua bagian bolon do, i ma: Padan na Robi dohot Padan na Imbaru.
9. Angka dia do buku di Padan na Robi?
Alus : Angka on do: 1 Musa, 2 Musa, 3 Musa, 4 Musa, 5 Musa, Josua, Angka Panguhum, Rut, 1 Samuel, 2 Samuel, 1 Raja-raja, 2 Raja-raja, 1 Kronika, 2 Kronika, Ezra, Nehemia, Ester, Job, Psalmen, Poda, Parjamita, Angka Ende, Jesaya, Jeremia, Andung-andung, Heseziel, Daniel, Hosea, Joel, Amos, Obaja, Jona, Mika, Nahum, Habakuk, Sepanya, Haggai, Sakaria dohot Meliaki.
10. Dia do goar ni angka buku na di Padan na Imbaru?
Alus : Ilanggo angka buku na di Padan na Imbaru, i ma: Mateus, Markus, Lukas, Johannes, Ulaon ni angka Apostel, Rom, 1 Korint, 2 Korint, Galatia, Efesus, Pilippi, Kolose, 1 Tesalonik, 2 Tesalonik, 1 Timoteus, 2 Timoteus, Titus, Pilemon, Heber, Jakobus, 1 Petrus, 2 Petrus, 1 Johannes, 2 Johannes, 3 Johannes, Judas, Pangunkapon.
Hatorangan :
a. Evangelium (Barita na Uli) na opat i: Mateus, Markus, Lukas, Johannes, barita di ngolu ni Tuhan Jesus.
b. Ulaon ni Apostel, i ma barita ni angka sisean i (Apostel) i, dung manaek Tuhan Jesus tu banua ginjang dohot barita ni hajongjongan ni angka huria.
c. Suratsurat ni angka Apostel i tu angka Huria dohot pangula dung jongjong huria i, i ma:
Surat Apostel Paulus tu Huria Rom, Korint (2), Galatia, Epesus, Pilippi, Kolosse, Tesalonik (2), Timoteus (2), Titus dohot tu si Pilemon.
Surat tu halak Heber.
Surat ni si Jakobus.
Surat ni Apostel Petrus (2).
Surat ni si Johannes (3).
Surat ni si Judas.
d. Pangunkapon ni si Johannes. Disurat di tingki na tarbuang si Johannes di Pulo Patmos, jala ungkap banua ginjang dohot angka na masa na naeng ro diida, i ma umbahen digoar buku i, 'Pangunkapon'.

11. Dia do na pinaboa ni Padan na Robi?
Alus : Dipaboa do taringot tu panompaon ni Debata di tano on dohot nasa na adong nang jolma pe. Laos songon nang parmulaan ni dosa, panogunogunon ni Debata di jolma na parjolo i dohot panogunogunonna di bangso ni Debata na gabe haroroan ni Sipalua hita jolma.
12. Dia do na pinaboa ni Padan na Imbaru?
Alus : Dipaboa do hasasaut ni bagabaga ni Debata, di parsuruNa di AnakNa Tuhan Jesus Kristus. Haoajak ni harajaon ni Debata dohot hapapatar ni harajaonNa i muse na tau las ni roha godang di hajolmaon.
Jaha : Gal. 4:4-5
13. Asa taringot tu ise do dihatindanghon Padan na Robi dohot Padan na Imbaru?
Alus : Taringot tu Tuhan Jesus Kristus do.
Jaha : Ul. 10:43
14. Dia do pamusatan ni hata ni Debata jala dia do ulaonna?
Alus : I ma buku Katekhismus na mangajarhon dalan hangoluan i tu hita, mangihuthon Hata ni Debata.
15. Piga bagian do isi ni Katekhismus jala angka dia ma goarna?
Alus : lima bagian do, ima :
a. Patik ni Debata.
b. Hata Haporseaon ni Halak Kristen.
c. Tangiang na niajarhon ni Tuhan Jesus Kristus.
d. Pandidion na Badia.
e. Parpadanan na Badia.

paragodungan.org

PATIK NI DEBATA

PATIK PARJOLO

Ahu do Jahowa Debatam! Ninna Debatanta. Nandang jadi marangkup Ahu bahenonmu Debatam.

Dia do lapatan ni i?

On do : Ingkon umbiar rohanta jala humolong jala umpos mida Debata asa mida nasa na adong.

PATIK PADUAHON

Nandang jadi ganaonmu jala ndang jadi sumanonmu manang aha na di banua ginjang dohot na di banua tonga on ro di na di bagasan aek na di toru ni tano, ianggo tung gabe sisombaon manang sioloan.

Dia do lapatan ni i?

On do : Ingkon dihabiari rohanta Debata jala ingkon holong rohanta di lbana asa ndang jadi iba marsomba tu sombaon manang tu ganaganaan, mangido hangoluan sian i, jala ndang jadi oloan begu manang ulpuhan ni hadatuon jala ndang jadi pos roha di ugasan homitan.

PATIK PATOLUHON

Nandang jadi dohonon goar ni Debata, ianggo so ture dalanna. Ai hona uhumna do sogot angka na marsineang di goarna.

Dia do lapatan ni i?

On do : Ingkon dihabiari rohanta Debata jala ingkon holong rohanta di lbana, asa unang hita olo mamuati manang manolonlonon manang marujarujaran na roa, manang mangansi marhitehite goar ni Debata; ai di na tarsosak dohot di tangiang dohot di pujipujian do sidohonon goar ni Debata.

PATIK PAOPATHON

Ingot hamu ma pabadiahon ari minggu il Di na onom ari ma ula hamu nasa siulaonmu, alai anggo ari papituhon i ari paradianan ni Jahowa,

Debatam do i. Ndang jadi ho mangula anggo na sadari i, manang anakmu pe manang borum, manang naposom lahilahi manang naposom boruboru, ro di pinahanmu ro di pangisi ni huta ni halak pe na mangebati hutam. Ai di na onom ari do ditompa Debata langit dohot tano dohot laut dohot nasa isina; dung i maradian do Ibana di ari papituhon i. Dibahen i do umbahen na dipasupasu Debata Jahowa ari paradiananNa i jala diparbadia i.

Dia do lapatan ni i?

On do : Ingkon dihabiar rohanta Debata jala ingkon holong rohanta di Ibana, asa unag tois rohanta di ajar na sian hata ni Debata, ingkon badia do hata ni Debata di rohanta jala ingkon ringgas rohanta tumangianghon dohot mangguruhon.

PATIK PALIMAHON

Ingkon pasangaponmu do natorasmu asa martua ho, jala leleng mangolu di tano na nilehon ni Jahowa Debatam di ho.

Dia do lapatan ni i?

On do : Ingkon dihabiar rohanta Debata jala ingkon holong rohanta di Ibana, asa unag lea rohanta mida natorasta dohot mida angka rajanta ro di angka natuatua. Ndang jadi paroonta rimas nasida, ingkon pantun do huta jala ingkon holong rohanta tu nasida, sioloan do nasida jala sisubuton do rohana.

PATIK PAONOMHON

Unang ho mamunu!

Dia do lapatan ni i?

On do : Ingkon dihabiar rohanta Debata jala ingkon holong rohanta di Ibana, asa unang hita olo mambahen sahitsahit tu nasa na mangolu, ingkon roha pangoluhon do rohanta di nasa na mangolu.

PATIK PAPITUHON

Unang ho mangalangkup!

Dia do lapatan ni i?

On do : Ingkon dihabiani rohanta Debata jala ingkon holong rohanta di lbana, asa toman rohanta jala porman dohot pangalahonta ro di hatanta, ianggo angka naung marbagas i ingkon masiparhamaolan jala masihaholongan.

PATIK PAUALUHON

Unang ho manangko!

Dia do lapatan ni i?

On do : Ingkon dihabiani rohanta Debata jala ingkon holong rohanta di lbana, asa unag hita olo mandobo heeng ni dongan jolma manang mambahen bisukbisuk mangalansumhon boniaga, ingkon sipagandaon ni rohanta do arta ni dongan jala siramothononhon.

PATIK PASIAHON

Unang ho olo manghatindanghon hata na so tutu maralohon dongan jolma.

Dia do lapatan ni i?

On do : ingkon dihabiani rohanta Debata jala ingkon holong rohanta di lbana, asa unag hita olo manggagapi dongan jolma manang manjehehon manang pahatahatahon, paoruhon sangapnasida, ingkon niampinan do dongan jolma anggo so tangkas dope binoto salana. Holan uhum na denggan i do paboaboaon.

PATIK PASAMPULUHON

N dang jadi haliangan ni roham bagas ni donganmu, ndang jadi haliangan ni roham dongan saripe ni donganmu, manang naposona baa, manang naposona boruboru, manang lombuna manang hodana, manang dia pe ugasan ni donganmu.

Dia do lapatan ni i?

On do : Ingkon dihabiar rohanta Debata jala ingkon holong rohanta di lbana, asa unang hita olo marangkal, mangarohai ugasan ni dongan jolma dohot ugasan tinadinghon ni ompuna, siurupanta do nasida mangaramoti nasa ugasan. Angkup ni i ndang jadi bolabolaonta pardihuta ni dongan jolma manang naposona pe, slapoan do nasida jala sidasdason mandapothon ulaonna hian.

Beha do pandok ni Debata taringot tu patik na sampulu i?

On do : Ahu do Jahowa Debatam! Ninna Debatanta, pargogo na so hatudosan jala parrimas, sai luluhononku do dosa ni amaama tu pinomparna ro di sundut patoluhon ro di sundut paopathon pinompar ni angka na sogo roha di Ahu, alai asi do rohangku di angka na marriburibu angka na marholong roha di Ahu, na so mangalaosi patikhi.

Dia do lapatan ni i?

On do : Dipalumba Debata do hita disi, didok do pinsangonna nasa na mangalaosi patikNa i. dibahen i tama do dihabiar rohanta rimasna, unang ma nilaosan patikna. Alai diparbagabaga do asi ni rohana, angkup ni i nasa na denggan di angka na so mangalaosi patikna. Dibahen i tama ma haholongan ni rohanta dohot haposan ni rohanta lbana, jala las rohanta mangoloi patikNa.

SUNGKUNSUNGKUN DOHOT ALUS TARINGOT TU PATIK NI DEBATA

16. a. Hea do dibege ho angka aturan ni olahraga?
b. Beha do ia Undang-Undang ni Negara, hea do dibege manang diparsiajari ho di sikola? Beha do molo adong na mangalaosi i?
c. Hea do diparrohahon ho taringot tu ruhut-ruhut ni panghataion dohot parbadi ni jambar di ulaon adat? Halak na beha do tardok na so sintong manglahon i?
17. Hea do dibege ho patik ni Debata?

Dia ma parasingan ni patik ni Debata sian angka aturan na marragam i songon i nang adat pe?

Alus : I ma patik i, i ma na nilehon ni Debata siulahononta.

Ia angka aturan, i ma dos ni tahi ni jolma laho mangaramoti hadengganon ni ulaon manang parsoran.

Ia adat, i ma ruhut dohot aturan na niulahonon ni jolma hombar tu tona ni angka ompungna.

Asa aturan dohot adat na binahen ni jolma do i, alai ia patik na sian Debata sandiri do i.

18. Patorang ma jolo, dia do patik siihuthonon ni halak Kristen?

Alus : I ma patik na sampulu i na pinasahat ni Debata tu bangso Israel marhite si Musa di dohot Sinai.

Jaha : 2 Musa 19:20

19. Piga bagian do tahe patik ni Debata?

Alus : Dua bagian do patik i, i ma :

- a. Sian patik 1 – 4 na mangarodihon holong ni roha di Debata.
- b. Patik 5 – 10 i ma na mandokon hita manghaholongi dongan jolma songon dirinta sandiri.

Apil : Mateus 22:37-40

Jaha : Barita taringot tu halak Samaria parasi roha i. Luk. 10:25-37

20. Aha do dipatandahon patik i tu hita?

Alus : Dipatandahon do tu hita dosanta jala ditogihon hita tu Tuhan Jesus.

Apil : Gal. 3:24

21. Piga bagian do ganup patik i?

Alus : Dua bagian do, i ma hata na marsuru dohot hata na mangorai.

PATIK PARJOLO

22. Pajojor ma jolo patik parjolo dohot lapatanna.
23. a. Aha do dioloi angka parbegu songon singkat ni Debata?
b. Ise do goar ni debata ni ompunta najolo, andorang so dijalo nasida Barita na Uli i?
c. Aha do panghorhon ni pangoloion tu debata i?
d. Hea do dibege ho taringot tu na sai adong dope na mangoloi na pinangido ni 'sumangot' manang 'sombaon'?
e. Hea do diida hamu parugamo na asing mangoloi debatana? Beha do dibahen laho mangoloisa manang manombasa?
f. Sai adong dope sian halak Kristen na oloan tu na tinompa sian Debata na manompasa? Manang na pasangaphon angka i?
Lehon ma tiruanna!
g. Alai hita halak Kristen holan ise do sioloanta?
24. Dia ma na disuru jala dia ma na diorai di patik parjolo on?
Alus : Disuru mangoloi holan sasada Debata. Diorai do mardebata sileban manang mambahen marangkup Debata (sinkritisme).
25. Songon dia do na mangoloi Debata?
Alus :
a. Marhatopothon na sintong do sude na nidok ni Debata, jala olo mangulahonsa sian nasa roha dohot gogo.
b. Na so mabiar mida hagagoon na mangambati Ibana laho mangoloi na nidok ni Debata.
26. Songon dia do tama biarta maradophon Debata?
Alus : Unang ma biar hatoban, alai naeng ma biar anak, na marlapatan mabiat mangarsahi Ibana.
Jaha : Rom. 8:15
27. Na mandok beha do: 'humolong rohanta tu Debata sian tu nasa na adong'?
Alus :
a. Manghaholongi Debata sian nasa roha, tondi dohot gogo jala mangoloi hatana sian las ni roha.
b. Manghaholongi Debata sumurung sian arta, ianakhon dohot hosaniba sandiri.

Jaha : 1 Musa 22:1-14 Job 2:9-10

- c. Manghatindanghon di ngolu dohot pambahenan na so adong Debata dungkon ni Debata Jahowa.

Jaha : 5 Musa 10:17

- 28. Dia do lapatan ni hata 'umpos mida Debata asa mida nasa na adong'?

Alus : Manghaposi Debata si saluhut na sinarohon ni rohanta, paboa holan na hasea do lehononna tu hita, huhut ndang ganggu nang so pintor dioloi lbana pangidoanta.

Jaha : Poda 3:5

- 29. Songon dia do na mardebata sileban?

Alus :

- a. Na mambahen angka na tinompa ni Debata, isara ni dolok, sunge, hau, mata mual, dohot na asing, songon debata na gabe sisombaon jala sipaolooloan.
- b. Na mardebatahon hasangapon, arta bisuk-bisuk, hagagoon, dohot angka bangko na marhatobanhon diri.
- c. Na marhaposan tu poda haliluon, na mandok na so adong Debata (atheisme).
- d. Na mangarajumi dos do sude agama, holan goar ni debatana dohot goar ni bukuna do na marasingasing.
- e. Na martangiang tu Debata Jahowa, alai huhut mangido tua slan sumangot dohot sahala ni ompungna manang huhut marhaposan tu dirina sandiri.

PATIK PADUAHON

30. Dok ma jolo patik paduahon dohot lapatanna.
31. a. Angka dia do na somal disomba angka sipelebegu?
b. Angka ise dope na marsomba dohot pasangapon ganaganaan di tingki on?
c. Boasa disomba jala dipasangap nasida ganaganaan? Songon dia do tahe dibahen?
32. Dia do asing ni patik parjolo sian patik paduahon on?
Alus:
a. Patik parjolo mangondolhon na holan sada do Debata, i ma Debata Jahowa sioloanta.
b. Patik paduahon mangondolhon songon dia do hita manomba dohot pasangapon Debata.
33. a. Beha do pandapotmu taringot tu ganaganaan, patung, hasandaran, begun a dirajumi parugamo na asing mewakili tondi ni debatanasida.
b. Songon i muse taringot tu angka tanda sian soara ni lali, huting, lampulampu, panangga dohot na asing dietong sipelebegu hira boaboa ni na naeng masa.
34. Dia ma na disuru di patik on dohot na diorai?
Alus :
a. Disuru do hita manghabiari dohot manghaholongi Debata dibagasan tondi dohot hasintongan.
b. Diorai do hita manggana manang pasumanhon manang aha na adong, asa gabe sisombaon manang sioloan.
35. Dia do lapatan ni na marsomba tu Debata dibagasan tondi dohot hasintongan?
Alus:
a. Mamuji dohot manjou Debata dibagasan roha dohot tondi na ias, ndang sipaulaula.
b. Pabadiahon ari Minggu jala ringgas hita tu angka parpunguan na manaringoti Hata ni Debata.
- Jaha : Mat. 18:20

- c. Mangauhon na joro ni Debata do ganup halak Kristen. Hombar tu na tarsurat di 1 Korint 3:16 'Ndang diboto hamu joro ni Debata hamu jala Tondi ni Debata maringan dibagasan hamu.
 - d. Pasangapon Debata marhite daging dohot tondinta.
Jaha : 1 Kor. 6:20
Apil : Rom 12:1
36. Asa na mangoloi sibolis do, angka na mangoloi begu dohot ulpuhan ni hadatuon?
Alus: Na mangoloi sibolis do, i ma:
- a. Na manghaporseai angka ugasan homitan, alemu dohot ajiajian.
 - b. Na manghabiar i dohot na marsomba tu sumangot, pangulubalang, tunggal panaluan, pane, saniang naga dohot hagagoon haholomon (mistik-kebatinan)
37. Beha do taringot tu horoscope (manjaha bintang di langit) dohot na mamereng nasib marhite na manjaha gurat-gurat ni tangan, parsambubuan, purba dohot na asing?
Alus : sala do nang angka i, ai saguru di huaso ni Debata do naung masa dohot na naeng masa dope.

PATIK PATOLUHON

38. Pajojor na jolo patik patoluhon dohot lapatanna.
39. a. Hea do ho hona pinsang ala digoar ho natorasmu, tulangmu manang gurum?
b. Hea do dibege ho na mamalsuhon tanda tangan dohot na manggadis goar ni halak?
Patorang ma jolo!
40. Dia ma na disuru dohot na diorai di patik on?
Alus : Disuru do hita manghaholongi, manghabiari Debata dohot manjou goarNa di tingki na tarsosak dohot di hasusaan manang uju martangiang dohot mamuji Ibana.
Diorai do hita mandok goarNa, ianggo so ture dalanna.
41. Dia ma parasingan ni patik parjolo tu patik paduahon dohot tu patik patoluhon?
Alus :
a. Patik parjolo: Mangondolhon na holan sada do Debata, i ma Debata Jahowa.
b. Patik Paduahon: Mangondolhon songon dia do hita manomba manang pasangapon Debata.
c. Patik patoluhon: Mangajari hita taringot tu ruhut na sintong laho manjou manang mangasahon goar ni Debata.
42. Songon dia do panjouon na sintong dig oar ni Debata?
Alus : Manjou goar ni Debata holan di na tarsosak, di hasusaan, di tangiang dohot di pujipujian.
43. Boasa didokhon Debata hita manjou goarNa di hamamasa ni hasusaan dohot di na tarsosak?
Alus:
a. Ala sasada Ibana do na tuk paluahon hita sian nasa ragam ni parmaraan.
Jaha : Psalmen 50:15
b. Ala Ibana do pargogo na so hatudosan di banua ginjang nang di banua tonga on, na maniop anak hunsi ni hamatean dohot banua toru.
Jaha : Pangk. 1:18; Jes. 57:15

- c. Asa unang talu manang mandele hita ia masa pe sahit, hapogoson, hamatean, dohot soro ni ari.
Ende : No. 153:1 'Ale Debata Lam Jonok'
Apil : Joh. 9:3
44. Marhitehite aha hita manjou goar ni Debata?
Alus : Marhitehite tangiang, ai didok do tu hita asa tongtong duno jala unang mansadi martangiang.
Jaha : Mat. 26:41
Apil : 1 Tes. 5:17
45. Dia do na diorai di patik patoluhon on?
Alus : Diorai do hita mandok goar ni Debata di na so ture dalanna, i ma din a mamurai, manolonolon manang marujarujaran na roa.
46. Songon dia do na mamurai?
Alus : Mangidohon tu Debata asa diparo jea tu na binuraan manang tu na mamurai i.
47. Songon dia do na manolonolon?
Alus :
a. Manjou Debata gabe saksi paboa na tutu do na nidok ni na manolon i, huhut mangido hamagoan molo so tutu na nidokna i.
b. Papos roha ni na ginabusanna.
Jaha : 3 Musa 19:12
48. Dia do lapatan ni na marujarujaran na roa?
Alus : Paotooto dongan, margaitgaithon na ramun, na paronsamhon roha dohot pingkiran, pahehe roha sibuk.
49. Dia do muse lapatan ni na margapgap?
Alus : Manuntut mandok hata na so tutu manang paulahon songon na holong rohana di Debata, hape rohana di bagasan dao do sian Ibana.
50. Boi do halak Kristen marjanji Jabatan?
Alus : Boi do hita 'marjanji', jala on do lapatanna: Na di bagasan biar tu Debata do hita jala manat mamingkirhon siulaonta i dohot sihatindanghononta i.
Angkup ni i na mangido gogo do hita tu Debata asa dipatau jala disondangi rohanta di ulaon siulaonta i (tugas manang jabatan na tajalo i).
51. Dia do lumbalumba ni Debata tu angka na marsineang di goarNa?

Alus : Ingkon hona uhum sogot sude angka na marsineang digoarNa. Ai didok do:

Ai ndang olo Debata lean (Galatia 6:7).

Ai dialo Debata do angka na jungkat roha (1 Petrus 5:5).

Ingkon maralus do sogot hita di angka hata na so gabeak na tahatahon (Mateus 12:36-37).

dargodungan.org

PATIK PAOPATHON

52. Pajojor ma jolo patik paopathon i dohot lapatanna.
53. a. Dia do ari paradianan ni halak Kristen, jala dia di parugamo na asing na binotom?
- b. Denggan do na mangulahon ulaon adat di ari minggu?
- c. Diarahon ho do donganmu molo losok ro tu parmingguan?
- d. Baritahonon ma jolo na binotom sian parmingguan na nidohotanmu.
- e. Songon dia do pangkilalaanmu molo so marminggu ho?
54. Dia ma na disuru patik on dohot na diorai?
- Alus : Disuru Debata do hita pabadianon ari Minggu I jala didokhon do hita asa mulaulaon sian nasa gogo ganup ari. Diorai do hita manoishon ari Minggu dohot Hata ni Debata.
55. Boasa gabe di ari Minggu hita maradian, ndang di ari Sabtu?
- Alus : Ala di ari Minggu do ari ni Tuhan i, i ma ari paningoran di haheheon ni Tuhan Jesus sian na mate.
56. Dia do lapatan ni na pabadianon ari Minggu?
- Alus :
- a. Maradian sian angka ulaon na somal slganup ari jala laho tu gareja umbege Hata ni Debata.
- b. Manghangoluhon Hata ni Debata marhitehite na mangulahon angka haholongon dohot asi ni roha, isarani pangapulion, pangurupion dohot na pararathon hata ni Debata.
- Jaha : Joh. 5:1-6; Mat. 12:1-8
- c. Mamingkiri dohot pahasorhusorhon Hata ni Debata huhut mamarangehonsa.
57. Aha do lapatan ni ringgas tumangihon Hata ni Debata?
- Alus :
- a. Mangarajumi umarga Hata ni Debata di rohanta jala rumingkot manangihonsa sian angka ulaon na asing.
- Jaha : Psalmen 19:11; Lukas 10:38-42

- b. Ringgas manopot parguruan ni halak Kristen jala papunguhon roha mangihuthon pungan i dibagasan ias ni roha.
Jaha : Psalmen 26:8; Ul. 16:13-15
58. Adong dope angka ari na asing na dos dohot ari Minggu?
Alus : Adong do, i ma angka ari pesta ni halak Kristen:
- Parningotan di hatutubu ni Tuhan Jesus.
 - Parningotan di hamamateNa.
 - Parningotan di haheheonNa sian hamatean.
 - Parningotan di hananaekNa tu banuaginjang.
 - Parningotan di haroro ni Tondi Porbadia.
 - Alai dohot do nang ari Taon Baru songon patujolo ni angka ari sataon i laho mangido pandonganlon dohot pasupasu ni Debata di hita laho mamolus taon i.
59. Aha debanari disuru di patik paopathon i?
Alus : Onom ari lelengna ingkon ulaonta nasa siulaonta.
60. Boasa pola ingkon mulaulaon hita di na onom ari i, molo na disarihon Debata do ngolu ni angka na porsea i?
Alus :
- Ala na ditompa Debata do ita jolma songon jadijadian ni tanganNa na ingkon mulaulaon. Asa ndada paksa umbahen na mulaulaon hita, ala tung naung hadirionta do i sian Debata.
'Na mangula do Damang rasirasa nuaeng, Ahu pe mangula do' (Joh. 5:17)
 - Na tarjou do hita mulaulaon asa martanggungjawab marhitehite gogo ni pamatang, pingkiran, pangkilalaan nang tondinta pe.
 - Marhite na mulaulaon gabe sahat hita tu tujuan ni ngolunta, i ma : marroha mauiate tu Debata.
Apil : Ep. 4:28
61. Asa, dosa do na so mulaulaon?
Alus :
- Dosa do molo so mangula jolma na boi mangula, ai halosohon do i.
 - Jaha : Poda 6:6; 1 Tes. 3:10
 - Tutu adong do sahorong jolma na so pola mulaulaon, i ma angka na marsahit, na hurang roha dohot na martihas.
62. Angka dia do na tama ulaon ni halak Kristen?

Alus:

- a. Manimbangi na asing do pangulaon ni jolma sian pangulaon ni masin na so marpangkilalaan; pangulaon ni jolma sian na holan mangusahahon gogo songon pangulaon ni dorbiala.
 - b. la pangulaon ni jolma, i ma patujolchon hagogon ni pingkiran, pangkilalaan (seni) dohot hagogoon partondion.
63. Tung sura maduma jala mamora hita, boasa tong dope ingkon mulaulaon hita?

Alus:

- a. Ala sipangkeonta do i gabe pasupasus tu dongan jolma.
Jaha : 1 Musa 12:3
 - b. Ala tongtong do manghirlim di pangurupion dohot holong ni roha sian hita angka na pogos dohot na hurangan.
Jaha : Mat. 25:35-40; 2 Kor. 8:14-15
64. Songon dia do na manolsi ajar sian Hata ni Debata?

Alus :

- a. Manadinghon angka parpunguan sian neang ni roha; mangelaela angka na ringgas asa marlosok ni roha; mangarsahi angka parminggu.
 - b. Manuntun mulaulaon di ari Minggu dohot di angka ari na pinarbadaian laho manarihon na ringkot di ngolu siapari.
 - c. Marlas ni roha di Hata ni Debata.
Jaha : Heb. 10:25
65. Dia do na diorai Debata di patik paopathon on?
- Alus : Diorai do hita manoishon ari na pinarbadaian i, suang songon i nang manoishon ajar na sian Hata ni Debata.

PATIK PALIMAHON

66. Pajojor ma jolo patik palimahon i dohot lapatanna.
67. a. Hea do diida ho hinapantun ni halak manghatai, marpahean, dohot hundul, uju diloloan adat, rapot manang di angka gareja?
b. Ise sian hamu nah ea mangalo manang manjua natorasna?
c. Hea do diida ho panomunomuon na tongan tu partogi ni negara?
68. Dia do na disuru jala na diorai di patik on?
Alus :
a. Didokhon do hita pasangaphon natorasta.
b. Diorai do hita mangaleai nasida
69. Holan ama dohot ina pangintubu i do na nidokna natoras?
Alus :
a. Manghaholongi nasida huhut mangoloi dibagasan hapantunon jala manubut rohanasida nang pe sipata marasing pamingkirionta dohot nasida.
b. Ringgas mangurupi nasida, lumobi di tingki hasusaan dohot di ari hatutuana.
c. Manjaga diri, asa gabe las ni roha parangenta di nasida, unang manghorhon tihas dohot hasurahan.
Jaha : Poda 23:25
d. Ingkon sipagandaon do sangap dohot sahala ni natorasna pangituai ni huta, panggomgomi nang parhalado ni huria pe.
70. Adong dope dalan na dumenggan laho manaringoti angka natoras, ompu, partogi angka naung monding?
Alus : Adong do, i ma marhite na pajongjong asrama, perusahaan manang yayasan na martujuan panaekhon hamajuon dohot pandaraman ni na torop. Songon singkat ni tugu, tambak ma i.
Jaha : 5 Musa 18:10-11; Parj. 9:5-6
71. Boasa disuru Debata hita pasangaphon natorasta?
Alus : Ala na sinu ni Debata do nasida laho patureturehon, manarihon, mamoda i dohot manogunogu hita tu nasa na hasea di ngolunta on.
Jaha : 3 Musa 19:32
72. Songon dia do tama angka natoras maradophon angka ianakhonna?
Alus :

- a. Pagodanggodanghon dohot manarohon na ringkot tu pematang dohot mangajarhon ajar dohot poda na sian Tuhan i.
 - b. Unang manggintali ianakhonna.
Jaha : Ep. 6:4
73. Songon dia do na mangaleai natoras?
Alus:
- a. Mangalo natoras, dohot mandok hata na so gabeak tu nasida.
Jaha : Poda 19:2
 - b. Mamupusi jala mangarsahi nasida.
Jaha : Poda 28:24
74. Songon dia do pasangaphon panggomgomi?
Alus:
- a. Unduk mangoloi undang-undang dohot angka aturan.
Jaha : Rom 13:1-7; 1 Petr. 2:13-15
 - b. Ingkon ingotonta do, na ingkon oloan do hita di Debata asa di jolma.
Jaha : Ul. 5:29
 - c. Manangianghonsa taringot tu na masa di bangso dohot panggomgomi i.
Jaha : 1 Tim. 2:1-2
75. Songon dia do induk maradophon anak gajianna?
Alus:
- a. Ingkon tataponna jala sarihononna do nasida, ndang mangasupi.
Jaha : Ep. 6:9
 - b. Nandang jadi pogoonna upa ni anak gajianna.
 - c. Ingkon rajumanna nasida songon dongan na hinaholongan.
Jaha : Ep. 6:5-7
76. Angka dia do sibahenon ni panggomgomi maradophon na ginonggomanna?
Alus :
- a. Mangaramothon asa sonang so hariboriboan, manglahon hadaulaton dohot uhum na sintong dohot hatigoran.
 - b. Panaekhon pangabahan ni situasi natorop songon na binahen ni Raja Daud dohot Raja Salomo.
77. Songon dia do na mangaleai huta, luat dohot huria?

Alus : Manegai hasadaon, manggugai roha ni natorop jala patubutubuhon parbolatbolaton di tongatonga ni huta nang luat dohot huria pe.

78. Dia do bagabaga ni Debata tu na pasangaphon natorasna?

Alus : Diparbagabaga Debata do hatuaon dohot ganjang ni umur.

dargodungan.org

PATIK PAONOMHON

79. Pajojor ma jolo patik paonomhon dohot lapatanna.
80. a. Ala ni aha do masa pamunuon?
b. Aha dope didok roham na dos tujuanna tu pamunuon?
c. Molo sinegaan pansarian ni dongan, pamunon do i tahe? Boasa?
d. Songon dia do pandapotmu taringot tu 'polusi' na gabe kotor aek dohot udara ala ni angka miak dohot timus na kotor di huta perindustrian?
Pamunuon do i?
e. Pamunuon do tahe molo so dos roha ni angka negara industry dohot angka negara pertanian di arga ni produksinasida be?
81. Angka dia ma na disuru dohot na diorai di patik on?
Alus :
a. Disuru do hita ingkon marroha pangoluhon di nasa na mangolu marhite na manghaholongi dohot na manambori pandaramannasida.
b. Mangaramothon dohot manjagahon lingkungan hidup na mangalehon hadameon nang hasonangan tu nasa na tinompa na humaliang hita.
c. Diorai do hita mamunu manang mambahen sahit-sahit tu nasa na mangolu dohot na mangalatei pandaraman ni dongan jolma.
82. Songon dia do lapatan ni roha na pangoluhon?
Alus :
a. Marhite na mian hita dibagasan haholongon.
Jaha : 1 Joh. 4:20
b. Roha na hobas mangurupi dongan unang marroha diri.
Jaha : Gal. 6:2
c. Mangolu di rohanta tondi panganjuon di angka hagaleon dohot hahurangan ni angka dongan.
d. Hobas jala girgir paturehon angka na dangol, na tading maetek dohot na tarpungjung.
Jaha : Poda 3:27
Apil : Mat. 25:40
e. Tongtong gara rohanta mamingkiri dohot mangalului dalan laho panaekhon parngoluan ni situan na torop.
83. Boasa diorai hita mamunu?

Alus : Ala Debata do nampuna hosa ni jolma, ala ni i holan Ibana do na jadi mambuat na nilehonna i.

84. Holan na mangagohon hosa ni dongan jolma do na nidokna mamunu, na nioraan ni patik on?

Alus : Ndang holan i, dohot do:

- a. Na manghosomi, jala na sumangkapi hosa ni dongan jolma.
- b. Na mangarsahi dohot na pasuaksiakhon dongan jolma.
- c. Na manegai pandaraman ni dongan.
- d. Na manuntun pajuthon roha ni dongan marhite hata manang pambahenan, nionjar ni jungkat ni rohana.
- e. Na maningkot.

85. Boasa masuk tu na mamunu do na maningkot?

Alus : Ala na mangalo huaso ni Debata do ibana jala na so porsea be di asi ni roha ni Debata.

86. Beha do bahenonta maradophon halak na naeng mamusa hita?

Alus:

- a. Hatop tapaboa tu panggongomi.
- b. Alai ia so tarpatupa be i, na patut do hita mangaramoti hosanta sian gogonta, ala ni i, jadi do hita mangalo ibana.

87. Boasa rajuman na sala do hita, molo ndang taramoti hahipasonta?

Alus:

- a. Sala do, ala silehonlehon ni Debata do hahipasoni.
- b. Ala na manegai ulaonna do ibana disi jala na mambahen boban tu sisolhot dohot na humaliangna.

88. Angka dia ma na targoar mambahen sahitsahit tu dongan jolma na nioraan ni patik on?

Alus:

- a. Na mamunu manang na mamugangi.
- b. Na mangalatei usaha ni dongan.
- c. Na pasombusombu dongan nang pe diboto na jonok tu parmaraan.
- d. Na manegai lingkungan hidup, siala roha ahut dohot roha diri.

PATIK PAPITUHON

89. Pajojor ma jolo patik papituhon i dohot lapatanna.
90. a. Hea do dibege ho angka panghataion na pahebahebahon hagiort ni pamatang?
Las do roham mambege i?
Diboto ho do, na dipatubu angka panghataion na songon i do hagiort ni pamatang?
- b. Nda sai adong do ditingki on angka tontonan, huburan dohot sijahahon na boi manggintali roha sibuk ?
Dipadao ho do roham sian i?
Diboto ho do na parmaraan do i tu partondianmu?
- c. Angka kegiatan dia do didok roham di haposoonmon sipatupaonmu laho padahon dirim sian angka i?
91. Dia do na disuru dohot na diorai di patik on?
Alus :
a. Disuru do hita pabadihon parsaripeon i huhut asa toman jala porman hata nang pangalahonta.
b. Diorai do hita mangulahon pangalangkipun dohot hahodaron.
92. Dia do lapatan ni pangalangkipun?
Alus:
a. Roha na mamingkiri na hodar dohot sangkapsangkap na roa maradophon halak.
Jaha : Mat. 5:28
b. Marhata na so gabeak na patubutubu pingkiran na hodar.
Jaha : Ep. 4:29
c. Patupahon pambahenan sihailahononhon.
Jaha : Ep. 5:5
93. Angka dia do sipasidingonta asa unang tartait hita tu hahodaron?
Alus : Pargadambuson, parmabuhon, na mangisap ganja, morphin, dohot angka ubat na maralo tu hahipason dohot hahormatan.
94. Songon dia do tama pardongasaripeon ni halak Kristen?
Alus :
a. Ingkon badia do parsaripeon i, ala na bagia do Debata na mangaturhonsa.

- b. Na so jadi sirang ia so sinirang ni hamatean, jala ndang tarjalo parsirangan ia so sinirang ni hamatean, jala ndang tarjalo parsirangan dohot na marsiduadua ala ni parsahiton dohot na so mardakdanak.

Jaha : Mat. 19:8

95. Songon dia do tama siingoton ni ama tu pardihutana?

Alus:

- a. Manghaholongi ibana jala olo manghophop.
- b. Manganju di angka hagaleon.
- c. Rade paingothon dibagasan holong dohot lambas ni roha.
- d. Manjagahon unang tubu hasomoron manang pangimburuon ni roha.
- e. Mangargahon ulaon dohot hadirion ni ina i, jala unang manihai.

Jaha : Ep. 5:25-33; Kol. 3:19

96. Aha do hapunjunjon ni tohonan haamaon?

Alus:

- a. Ulaon panogunoguon di tonga ni bagas.
- b. Mangulahon hamalimon di bagasna.
- c. Manarihon na ringkot tu pangisi ni bagasna.
- d. Sitiop uhum dohot adat di tonga ni jabu dohot hutana.
- e. Manggomgom jabuna.

Jaha : Ul. 10:9

97. Songon dia do tama siingoton ni ina tu dongan saripena?

Alus:

- a. Marroha pangoloi jala haposan.
- b. Marsaor dibagasan halambohon dohot hamenahon ni tondi.
- c. Manghasabamhon na adong dohot marhaserepon ni roha.
- d. Padaohon parungutunguton, haremengon dohot panihaion.
- e. Manghobasi di tonga ni jabu dibagasan minar ni bohi.

Jaha : Kol. 3:18; 1 Petr. 3:3-16

- f. Unang manjuui ama mangulahon na so patut nionjar ni biar hatinggalan zaman, sihol tu arta dohot marlobilobi manang kemewahan.

98. Aha do ulaon hapunjunjon ni tohonan hainahon?

Alus:

- a. Radot manghobasi jabuna.
- b. Mangaramothon hadameon dohot sonang ni roha.

- c. Jamot di pardabudabuanna.
- d. Panungkoli jala pangurupi di ulaon ni ama.
- e. Na basar, na ungkap roha martamue dohot manatap na dangol.
- f. Na mangaradoti parsauran na denggan tu sude sisolhot, angka aleale dohot hombar bagas.
- g. Na nunut di angka ulaon, benget di parsorion jala marhanalomhon na adong.
- h. Jaha : Poda 31:10-31

99. Songon dia do panarion ni natoras di pangoluonnasida na saripe?

Alus : Disosoi Hata ni Debata do, asa ganup ama dohot ina martanggungjawab di hadameon ni pangisi ni bagasna asa jumpang ripe na martua.

100. Beha do taringot tu angka ama dohot ina na mabalu?

Alus:

- a. Dumenggan do molo dihabengethon parsorionna i.
- b. Alai molo sai taronjar do rohana marhasahatan muse na denggan do nang i laho pasiding dirina sian pangjunan.

Jaha : 1 Kor. 7:9

101. Songon dia do tama naposobulung Kristen di tingki maroroan?

Alus :

- a. Dipangke ma tinki na songon i laho masitandaan roha dohot masiantusan.
- b. Dijagahon ma asa unang madabu tu jorgong ni sibolis na manghorhon haurahon,
- c. Rap marsiajar ma nasida di panogunoguan ni Debata diparsorionnasida tu tingki na naeng ro.

PATIK PAUALUHON

102. Pajojor ma jolo patik paulahon i dohot lapatanna.

103. a. Aha do dihorhon panangkoon i tu na hatangkoan i?

b. Aha do muse dihorhon panangkoon i tu na manangko i sandiri?

c. Beha do diida ho ujung ni angka panangko?

d. Aha do lapatanna molo didok, songon na manginum aek laut do panangkoon i.

Ingot : Aek laut ansim do, molo niinum lam mauas do iba.

e. Antong beha do sikapta taringot tu panangkoon?

104. Dia do disuru dohot diorai Debata marhite patik on?

Alus :

a. Disuru do hita pagandahon dohot mangaramoti arta ni dongan.

b. Diorai do hita mandobo hepeng ni dongan, mamboan bisukbisuk mangalamsumhon bonoaga dohot na targoar panangkoon.

105. Songon dia do bahenonta laho pagandahon, arta ni dongan jolma?

Alus :Mangurupi nasida laho pamajuhon pansarianna marhite gogo nang pingkiran, pasalisihon hepeng so pola marbunga na torbang dohot painjamhon ulaula.

106. Songon dia do na nidokna mangaramothon arta ni dongan?

Alus:

a. Mangajari nasida asa diboto mamangke artana.

b. Mangambati angka pambahenna na manegai pansarian ni dongan.

c. Mangaramothon arta na dipainjamhon manang dipasimpanhon tu iba jala pangaramoti di ugasan hatopan.

Jaha : 1 Musa 39

107. Songon dia do bahenonta mangurupi dongan na tarsosak?

Alus :

a. Mangalehon asiasi.

b. Patuduhon dohot mangusahahon dalan ni ngolu, isara ni ulaon.

Jaha : Poda 19:17; Jak. 2:15-16

c. Manogunogu asa olo jala tau mulaulaon.

108. Dia do nanidokna mandobo hepeng ni dongan jolma, na nioraan na di patik on?

Alus :

- a. Mangido bunga ni hepeng na torbang.
- b. Mambuat hepeng ni dongan marhite paksa dohot sian na so binotona.
- c. Mamogo upa ni panglana dohot ugasan na jumpang.
- d. Mangorui parbagian ni donganna.
- e. Mambuat pangomoan sian dalan na so turut.
- f. Manggade na so ugasanna dohot mamorso na sinalina.
- g. Manjalo sisip dohot mameop ugasan tangkoan.
- h. Manggandagandai utang dohot mamorso utang.

Jaha : Amos 2:7-8

109. Dia do na nidokna mambahen bisukbisuk mangalansumhon boniaga?

Alus :

- a. Mamangke suhatsuhat dohot dasing na so tingkos manang na mardua solup.
- b. Manambanambai manang mangoruorui arga.
- c. Paototohon panuhor marhite barang tiruan.
- d. Mangorui hinadenggan dohot hinatogu ni borongan.
- e. Mambahen bisukbisuk asa guga arga pasaran.

110. Angka dia dope na ginoaran ulaon panangkoon?

Alus :

- a. Mamalsuhon parjanjian.
- b. Mamogo tona, mamogo piring manang mangorui parbagian ni laba tu dongan.
- c. Manghansim manang mambuat komisi na torbang.
- d. Pausat tuhor ni parbalohan.
- e. Mambuat ugasan ni halak na oto dohot na metmet.

111. Aha do mangonjar roha ni jolma laho manangko?

Alus :

- a. Halosohon mangula dohot pengangguran.
- b. Hapogoson na so marsamari.
- c. Pargadombuson dohot ngolu na marlanggelange.
- d. Parminumon, parmabuhon dohot manganhon na di balian ni hurum.
- e. Pangiburuon, roha pangapianon dohot late.

112. Songon dia do dalan pasidinghon panangkoon?

Alus :

- a. Manghasabamhon na adong.
- b. Ringgas mangula jala huhut marpangontik.
- c. Padaohon roha pangapianon, pangiburuon dohot pargadombuson dohot parmabuhon.
- d. Mangguruhon keterampilan manang hataun mangula.
- e. Marpos ni roha di panarohon ni Debata.

Jaha : 1 Tim. 6:6-10; Poda 6:6-11; Heb. 13:5

Ende : No. 12:3+8+12

PATIK PASIAHON

113. Pajojor ma jolo patik pasiahon dohot lapatanna.
114. a. Aha do jotjotan na gabe bingkas ni parsalisian?
b. Aha do dihorhon barita propaganda?
c. Tongtong do sai sintong barita reklame/iklan?
d. hea do dibege ho halak na manggandai hata?
e. Dia do denggan, hohom sian na godang manghatai?
115. Antong tauji ma jolo patangkashon, dia do na disuru dohot na diorai marhite patik on?
Alus:
a. Disuru do hita manjagahon goar na denggan ni angka donganta marhite na mangampini dongan jolma molo so tangkas dope binoto hasalaanna dohot paboahon uhum na denggan taringot tu nasida.
b. Diorai do hita manggagapi dongan jolma, manjehehon manang pahatahatahon paoruhon sangapna.
116. Dia do lapatan nina mangampini dongan?
Alus:
a. Mangondihon dongan maradophon barita na paroaroahon.
b. Paboahon hasintongan laho mangalo barita na roa i.
117. Aha do na tau mandasdas hita mangampini donganta?
Alus:
a. Holong ni roha di dongan na marrojahan tu holong ni roha ni Tuhan Jesus di hita.
b. Roha na mangalului hasintongan.
Jaha : Pilemon 1-25
118. Dia do lapatan ni paboahon uhum na denggan?
Alus : Manghatindanghon barita na sintong taringot tu dongan i.
Jaha : Ul. 8:24-28
119. Dia do lapatan ni na manggagapi dongan?
Alus:
a. Patubutubu barita manang hata na so sintong holan laho paroaroahon nasida.
Jaha : Ep. 4:25; Mat. 12:36
b. Mamorso na denggan na niula ni dongan.

120. Dia do lapatan ni na manjehehon?

Alus:

a. Mangalap manaruhon hata dohot mambungka rahasia ni dongan laho patubuhon parsalisian.

Jaha : Poda 11:13

b. Pasahathon na so marsala tu tangan ni musu.

Jaha : Mat. 26:14+16+50; 1 Sam. 23:19-20

121. Dia do lapatan ni na pahatahataon dongan?

Alus : Manguhumuhumi dongan di jolo ni jolma laho paoruhon sangapna.

Jaha : Luk. 6:37

PATIK PASAMPULUHON

122. Pajojor ma jolo patik pasampuluhon dohot lapatanna.
123. a. Hea do dibege hamu umpama na mandok: 'Lamotlamot hata ni begu, risirisi hata nijolma?' Aha do lapatanna?
- b. Aha do lapatan ni : 'Pagar Makan Tanaman'?
- c. Dia do haroaon ni kapitalisme dohot imperialism?
124. Antong molo songon i, dia ma na disuru jala na diorai marhite patik on?
- Alus : Disuru do hita laho;
- a. Mangurupi dongan mangaramoti nasa ugasanna.
- b. Mangapoi manang mandasdas angka na mardongan sabagas, na maraleale, na saulaon, na marsisolhot dohot na marsahuta asa marparsaoran na denggan.
- Diorai do hita laho;
- a. Mangangkali dohot mangarohai ugasan ni dongan.
- b. Mamolamola angka na mardongan sajabu, na marsahuta, na marsisolhot, na sisada ulaon dohot na maraleale.
125. Aha do lapatan ni na manghaliangi?
- Alus : Mangkaliangi i ma marsangkap mambuut ugasan ni dongan marhite angkal dohot mamolamola pangisi ni bagas ni dongan.
- Jaha : Jes. 5:8
126. Dia do parasingan ni na manghaliangi sian na manangko, na niloraan ni patik paualuhon?
- Alus : Manghaliangi i ma sangkapsangkap ni roha; manangko i ma na niua ni tangan.
- Alai rap hona uhum do na manguilahonsa.
127. Aha do lapatan ni na mamolamola di bagasan patik on?
- Alus : Paboahon hahurangan ni dongan tu dongan saripena asa sega parsoraan nasida jala gabe tu iba rohana. On do jotjot dibahen halak laho pasauthon sangkap na roa na dibagasan rohana.
- Jaha : 2 Sam. 15:1-6
128. Hape ingkon beha do hita didok Debata di patik on?

Alus : Ingkon urupanta do donganta mangaramoti nasa na di ibana.

Jaha : Pilemon 13-14

Apil : Pilippi 2:4

PANDOK NI DEBATA TARINGOT TU PATIK NA SAMPULU I

129. Pajojo ma jolo beha do pandok ni Debata taringot tu patik na sampulu i dohot lapatanna.

130. Aha do dipaboa hata i tu hita?

Alus :

a. Bagabaga tu angka na mangaradoti patikna.

Jaha : Jes. 48:18

b. Lumbalumba doot uhum tu angka na mangalaosi patikna i marsundutsundut.

Jaha : Rom. 1:32; Sak. 2:10

131. Aha do dibagabagahon Debata tu angka na mangoloi patikna?

Alus : Asi ni roha ni Debata dohot nasa na denggan.

Jaha : 1 Samuel 2:30; Poda 8:17; 1 Tim. 4:8

132. Dia do asi ni roha ni Debata na binagabagahonNa?

Alus :

a. Hasesaan ni dosa

b. Hangoluan nuaeng dohot hangoluan na hot ro di salelenglelengna.

133. Aha do uhum tu angka na mangalaosi patikNa?

Alus: Rimas ni Debata tu na mangalaosi dohot tu pinomparna marsundutsundut. Dosa ni amana diluluhon tu pinomparna.

134. Aha do guna ni saluhut patik ni Debata?

Alus:

a. Siparorot hita do patik i, asa taboto aturan siihuthononta.

Jaha : Gal. 3:24

b. Sorminan do i, na patuduhon hahuranganta asa taboto paturehon dirinta.

Jaha : Gal. 3:24; Rom. 3:20

- c. Marhite patik i, taboto ma na so tarulahon hita sude na nidok ni Debata, gabe taronjar rohanta mangido asi ni rohaNa.

135. Dapot hita do hatigoran marhitehite na mangulahon patik i?

Alus:

- a. Nandang, ala ndang tarulahon jolma singkop patik ni Debata.
- b. Asa dapot hita hatigoran di adopan ni Debata ingkon porsea do hita di Jesus Kristus i.

Jaha : Gal. 2:16; Rom. 10:4

- c. Apil : Rom 10:4

Ende : No. 33:2

136. Boi do holan deba sian patik i ulahononta?

Alus:

- a. Nandang, ai sada do tujuan dohot isi ni sude patik i, asa parholong ni roha hita.

Jaha : Mat. 22:37-40

- b. Ala ni i molo taulahon pe saluhut patik i, alai ndang dianturehon na sada, nunga gabe parsala ibana disaluhutna.

Jaha : Jak. 2:10

paragodungan.org

**HATA HAPORSEAON
NI HALAK KRISTEN**

PONGGOL PARJOLO

Mula ni nasa na adong

Ahu porsea di Debata Jahowa. Ido Ama pargogo na so hatudosan na tumompa langit dohot tano.

Dia do lapatan ni i?

On do : Diparhatutu rohangku do adong Debata na tumompa nasa na manggulmit. Ditompa do dagingku marpanidaan, marparbinegean, marparnianggoan, marpanghilalaan, marpandaian, dilehon do roha tu tondingku jala dipatureture do i saluhutna rasirasa nuaeng; angkup ni i dilehon do tu ahu parabiton dohot sipanganon siganup ari, ro di nasa na hasea di ahu di hangoluan on; diramoti do ahu asa unang mago jala diondingi do ahu di parmaraan; luhutna i ndang sian denggan ni parangeku manang sian jonou ni tua, tung asi ni rohana sambaing do i dohot denggan ni basaNa umbahen na dilehon; dibahen i tama hupujipuji Ibana jala tama huoloi na nidokna ala saluhutna i, paboa las ni rohangku di Ibana. I ma na tutu situtu.

PONGGOL PADUAHON

Hata haluaon ni manisia

Ahu porsea di Jesus Kristus Anak ni Debata Jahowa na sasada i, I ma na tinubuhon ni si Maria, na gabegabean sian Tondi Porbadia andorang so habubuhan. I do Tuhanta na tumaon na bernit di panguhuman ni si Latus, na mate tarpajal do Ibana di hau pinarsilang, na tuat tu banua toru dung ditanom, na mulak mangolu di ari patoluhon, na manaek tu surgo, laho hundul tu siamun ni Debata Jahowa, Amana i, pargogo na so hatudosan i, disi ma Ibana na paima mulak sogot tu tano on; manguhumi halak na mangolu dohot na mate.

Dia do lapatan ni i?

On do : Na diparhatutu rohangku do; Anak ni Debata situtu Jesus Kristus na tinubuhon ni Amana din a robi ni robi, jala jolma situtu do Ibana ditubuhon si maria andorang so habubuhan, i do Tuhanku na humophop ahu jala na manghamonanghon. Dipalua do ahu sian hamagoan, ahu na hona toru dohot sian dosa dohot sian hamatean dohot sian gomgomon ni

sibolis i, ndada sere manang perak dibahen, tung mudarna do na arga jala na bagia dohot habebnit ni siak ni bagi na tinaonna i ohot hamatean na so sian salana, asa Ibana nampuna ahu jala asa tigor rohangku jala bontor jala sonang mangoloi Ibana salelenglelengna di gomgomanna; asa songon Ibana ahu, na hehe sian hamatean, na mangolu jala manggomgomi salelenglelengna. I ma na tutu situtu.

PONGGOL PATOLUHON

Hata habadiaon ni halak Kristen

Ahu porsea di Tondi Porbadia, jala andong sada huria na badia, huria hatopan ni halak Kristen angka na badia, dohot di hasesaan ni dosa dohot di hata i na mandok: Mulak mangolu do sogot daging ni halak naung mate, dohot di hangoluan na so ra suda.

Dia do lapatan ni i?

On do : Na diparhatutu rohangku do, na so tarbahen ahu porsea di Jesus Kristus Tuhanku manang mandapothon Ibana, ianggo tung sian roharohangku anang sian gogoku sandiri na dijou Tondi Porbadia i do ahu marhite sian Barita na Uli, dilehon do asi ni rohana patiurhon rohangku, diparbadiai do rohangku jala dipatongtong do ahu dibagasan haporseaon na ture, tudos tu na binahenna i nuaeng, tu saluhut halak Kristen na di tano on; ai dijou do nasida jala dipapungu jala dipatiur do rohanasida jala diparbadiai jala dipatongtong do nasida di Tuhan Jesus di bagasan haporseaon na sasada i na tigor i. Angkup ni i buas do rohana manesa dosangku ganup ari, ro di dosa ni angka donganku na porsea; dung i pangoluonna do ahu ari parpudi ro di nasa na mate, dung i lehononna do ahu dohot tu nasa na porsea di Tuhan Jesus hangoluan na so ra suda. I ma na tutu situtu.

**SUNGKUNSUNGKUN DOHOT ALUS TARINGOT TU HATA HAPORSEAEON
NI HALAK KRISTEN**

137. a. Hea do dibege ho pandohan ni hita Batak na mandok:
'Sala mandasor segala luhutan'?
- b. Diboto ho do, na ganup bangso do di portibi on tongtong manghaporseai dasar falsafah hidup ni bangsona asa tongtong gabe bangso na togu?
- c. Diboto ho do, ia Huria i pe, adong do ojahan ni sihaporseaanna asa Manahan tongtong jongjong?

138. Antong dia ma ojahan ni sihaporseaon ni halak Kristen ?

Alus : Ia hata haporseaon ni halak Kristen, i ma pangarimpunan ni na hinaporseaan ni halak Kristen, hombar tu naung pinasahat ni angka ama ni Huria sian najolo dope. Digoari do i hata haporseaon ni halak Kristen sitolu ponggol, ala sipata hata haporseaon na sian angka Apostel sisampuldua ponggol, manang sipata didok : Poda haporseaon Nicea dohot Konstantinopel, ala di huta i dipahot pangibulan ni oda haporseaon i.

139. Aha do huroha haporseaon i?

Alus:

- a. Ia haporseaon i ma silehonlehon ni Debata na gabe hasurungan ni jolma, asa adong do jolma i hagagoon laho manghaporseai dohot so manghaporseai.
- b. Heb. 11:1 mandok: 'Alai anggo haporseaon i, pos ni roha do i di angka sihirimon jala pamotoan na tontu taringot tu na so niida'.
Antong umbidang jala umbagas do na hinamham ni haporseaon sian na binoto dohot na niantusan.
- c. Ia haporseaon i ma pangakuan taringot tu sada hasintongan na ruar sian panggora ni roha.

140. Aha do apatan ni panggora ni roha?

Alus:

- a. Ia panggora ni roha, na tinompa ni Debata do i di diri ni jolma i, asa gabe ulaula ni jolma laho manimbangi angka na niulana.
- b. Ndang tunduk panggora ni roha ni jolma i tu pingkiranna, hira hagagoon na pulik do i laho manimbangi angka na niulana sandiri.

- c. I do Alana molo mate panggora ni rohana gabe ndang diboto be manimbangi dia do na denggan dohot na roa.
141. Boasa tadok di hata haporseaon i: 'ahu porsea'?
- Alus : Ala mangolu do ganup binahen ni haporseaonna sandiri.
- Jaha : Habakuk 2:4
142. Piga ponggol do tahe hata haporseaon i?
- Alus : Tolu ponggol do.
143. Dia dipatorang di ponggol parjolo i?
- Alus : Dipatorang do disi panompaon dohot pangaramotion ni Debata di nasa na adong dohot ulaon hapunjungan ni Debata.
144. Dia dipatorang di ponggol paduahon?
- Alus : Dipatorang do disi haluaon ni pardosa na pinatupa ni tuhan Jesus, jala i do ulaon hapunjungan ni Tuhan Jesus.
145. Dia do dipatorang di ponggol patoluhon?
- Alus : Dipatorang do disi ulaon hapunjungan ni Tondi Porbadia, i ma pabadihon hita pardosa, jala papunguhon hita di bagasan huria i, asa lam saot hita tu Debata.
146. Aha do dipabotohon sasudena i tu hita?
- Alus : Parbinotan na tangka di Debata, na mangalehon di hita hangoluan na salelengnilelengna.
- Jaha : Joh. 17:3
147. Piga do Debatanta?
- Alus : sada do Debatanta, alai sitolusada do i, i ma Debata Ama, Debata Anak dohot Debata Tondi Porbadia.
148. Beha do antusanta Debatanta i, tolu alai sada, sada alai tolu?
- Alus :
- a. Nandang haantusan hita i ai umbalga do Ibana sian hita, holan manghaporseai do hita din a nidokNa i.
- b. Na boi manguropi hita, i ma : ala taboto asing do hasadaon ni barang na mate isara batu, sian hasadaon ni jolma na marroha jala martondi; asing do hasadaon ni sidua dimensi i ma panjang kali lebar dohot hasadaon ni sitolu dimensi i ma panjang kali lebar kali tinggi. Suang songon i do ia hasadaon ni Debata Sitolusada i, andul sian na boi pingkiran ni jolma.
149. Sian dia taboto Sitolusada do Debata?

Alus : Mat. 28:19 : 'Laho ma Hamu, podia hamu ma saluhut bangso, didi hamu ma nasida tu bagasan Goar ni Ama, Anak, dohot Tondi Porbadia'.

II Kor. 13:13 : 'Sai didongani asi ni roha ni Tuhan Jesus Kristus dohot holong ni roha ni Debata dohot parsoran ni Tondi Porbadia ma hamu saluhutna'.

1 Joh. 5:7-8 : 'Ai tolu do na manghatindanghon, i ma Tondi I, aek i dohot mudar i, jala sada do na tolu i.

150. Songon dia do tahe didok Panindangion Haporseaon ni HKBP taringot tu 'Hasitolusadaon ni Debata'?

Alus : Tahaporseai jala tahatindanghon do : Sada do Debatanta, jala huhut sitolusada do, i ma: Debata Ama, Debata Anak, Debata Tondi Porbadia.

Jaha : Joh. 5:19; Joh. 14:11; Joh. 1:1; Joh. 15:26; II Kor. 13:13; Mat. 28:19.

Na ditubuhon Ama i do AnakNa sian hadirionna sandiri sian mula ni mulana ro di salelengnilelengna, mandok: Suang songon Ama i na so marmula na so marujung, songon i do Anak i. Suang songon i muse do na so marmula jala marujung do Tondi Porbadia i, i ma na borhat sian Debata dohot Anak i.

Jaha : Joh. 15:26

151. Marhite i, poda na songon dia do na taalo dohot tatulak?

Alus : Holan sada do Debata (Maha Esa) jala mangarajumi na tumoro do Anak i dohot Tondi i sian Ama i.

Na padoshon Debata Sitolusada na tahaporseai dohot 'debata na tolu' ni ugamo hasipelebeguon ni halak batak. Ala naginoaranna 'debata na tolu', na marmula do disi debata jala tumoru sian mulajadi na bolon ni ugamo Batak.

152. Songon dia do taringot tu Debata Sitolusada na manontong i?

Alus:

- a. Na so marmula na so marujung do Debata Ama, suang songon i na so marmula na so marujung do Debata Anak, i ma Tuhan Jesus Kristus, na tinubohon ni AmaNa sian salelengnilelengna: songon i muse, na so marmula na so marujung do Tondi Porbadia jala na ro do Ibana sian Debata Ama dohot Anak.
- b. Sada do Debatanta, jala huhut Sitolusada do, i ma: Debata Ama, Debata Anak, Debata Tondi Porbadia.

paragodungan.org

PONGGOL PARJOLO

153. Pajorjor ma jolo hata haporseaon ponggol parjolo dohot lapatanna.
154. a. Hea do dibege hamu turiturian taringot tu mula ni jolma, tao Toa, suansuanan dohot angka bintang?
b. Hea do dibege hamu di parsikolaan taringot tu evolusi? (Patoranghon ni guru ma na pingkiran ni angka jolma do i sude. langgo pandok ni Hata ni Debata i ma na tahatindanghon di hata haporseaon on).
c. Aha do parasingan ni andohan manompa sian manopa?
155. Piga bagian bolon do na hinamham ni ponggol parjolo on?
Alus : Tolu bagian bolon do.
a. Taringot tu Debata Jahowa
b. Taringot tu na tinompa Debata di portibi on, dohot parluhutan i, na tarida dohot na so tarida.
c. Taringot tu jolma na pinabangkutna gabe pangarajai di saluhut na tinompana i.
156. Ise do goar ni Debata na tahaporseai i?
Alus:
a. Debata Jahowa do, na mandok : Ahu na adong hian, Ahu naung adong nuaeng, Ahu na adong sogot. Na marlapatan do goar i, ia Debatanta i, na manontong do i na so marmula na so marujung.
Jaha : 2 Musa 3:14
b. Di buku na badia I, godang dope goar na asing ni Debatanta i:
a) Zebaot = Ulubalang ni Parangan. Jaha : Jos. 5:13-14
b) Elohim = Pargogo na so hatudosan.
c) Adonai = Tuhan na marhuaso.
d) Debata Ama = Ala Ibana do haroroan manang mula ni nasa na adong.
157. Songon dia do pangalaho dohot bangko ni Debata dipatuduhon nang dipaboa tu hita jolma?
Alus :
a. Na so marmula na so marujung.
b. Pargogo na so hatudosan.
c. Na so olo muba.
d. Haposan.

- e. Parbinoto na sun.
- f. Na so hadodoan.
- g. Paruhum na tigor.
- h. Parasi roha godang – Pardenggan basa
- i. Parholong roha na sumurung.
- j. Parroha na sintong.
- k. Na sun badia.
- l. Na manggomgomi langit dohot tano.
- m. Na manompa nasa na adong.

Jaha : 5 Musa 6:4; 2 Musa 3:14; 1 Musa 17:1; Psalmen 105:8; Joh. 3:16.

Na sumurung slan saluhut angka pangalaho dohot bangko ni Debata na dipatuduhon tu hita jolma i ma : ‘Haholongon do Debata’.

Jaha : 1 Joh. 4:8

(Ida konfessi HKBP Bindu 1)

158. Dia do angka ugamo na asing na humaliang ho, beha do pangantusionnasida taringot tu debatana?

Alus:

- a. Ia angka sipelebegu, disomba nasida do angka debata sileban i ma:
 - a) Tondi ni na mate (begu, sumangot, sombaon)/animisme.
 - b) Tondi haholomon manang jahat-spiritisme.
 - c) Jolma manang barang na sakti, na boi ninna mangalehon pasupasu dohot hagagoon tu jolma (panteisme, dinamisme, kebatinan, mistik, isara ni ganaganaan, tugu, ajimat, dohot na asing).
 - d) Angka debata (politeisme).
- b. Alai laos adong do jolma na so porsea na adong Debata, i ma : halak komunis (atheis).

159. Songon dia do hajongjonganta maradophon debata sileban didok hata ni Debata?

Alus : Ingkon tulahanta jala padaonta do nasa pardebataon sileban marhite na manghaposi holan Debata.

Jaha : 5 Musa 18:30-31; Jes. 8:19

160. Angka dia ma na tinompa ni Debata?

Alus : Nasa na adong, na tarida dohot na so tarida, surusuruan ro di angka na so martondi i ma binatang. Asa sabagian sian na tinompa i do portibi na taingani on, na somal tagoari: langit dohot tano dohot laut dohot nasa isina sudena.

161. Beha do panompaon ni Debata di angka i sude?

Alus : Dibagasan onom ari do tinompa Debata nasa na adong. Holan marhite HataNa do manjadi saluhutna i, jala sian na so adong hian gabe adong. Digoar do i *Creatio ex nihilo*.

162. Jadi holan i do diula Debata di portibi on sahat tu saonari?

Alus :

a. Ndang, ai tongtong do mangula Debata, na marmuduhon dohot mangaramoti nasa na tinompaNa i.

Jaha : Joh. 5:17

b. Laos dipatureture Ibana do langit dohot tano dohot nasa isina huhut digomgomi Ibana angka i.

Jaha : Ul. 14:17; 1 Musa 3:23

Ende : No. 253:4

163. Dia do na sumurung sian saluhut na tinompaNa i, jala boasa?

Alus : Jolma do na sumurung sian i saluhutna, ala:

a. Tumiru rupana dohot tudos tu pangalahona do ditompa jolma i.

Jaha : 1 Musa 1:26

b. Diombushon Debata do hosa hangoluan tu jolma i umbahen gabe martondi na mangolu jolma i.

Jaha : 1 Musa 2:7

c. Jolma i do disuru Debata mangarajal saluhut na tinompa i.

Jaha : 1 Musa 1:28

164. Antong songon dia do hajongjongan ni halak Kristen maradophon nasa na tinompa ni Debata?

Alus : Sihamauliatehononna do tu Debata ala dibasabasahon Ibana portibi on dohot nasa isina sudena gabe hatuaon di jolma jala hasangapon di Debata.

165. Molo songon i, sala do hape ia ditoishon jolma portibi on dohot angka na tinompa ni Debata? Jala boasa?

Alus:

a. Sala do, alai siramotanta do i jala sihamauliatehononta.

Jaha : 1 Tim. 4:4

- b. Alai sabalikna pe sala do, molo marsilohot rohanta tu portibi on gabe so taingot na di banuaginjang do sambulonta.

Apil : Kol. 3:2

166. Beha do umbahen tau jolma i mangarajai saluhut na tonompa i?

Alus : Ala ditomba Debata do jolma i tumiru rupana tudos tu pangalahona, mandok: Ditompa do jolma i maralamat na lima (Panca Indera); martondi, marroha dohot marpingkiran.

167. Holan i do hasurungan ni jolma i sian nasa na tinompa?

Alus : Ndang holan i, ai dibasabasahon Debata do tu jolma i:

- a. Manimbangi taringot tu na sontong dohot na sala (Logika)
Jaha : 1 Kor. 1:30
- b. Mangantusi dohot manimbangi na uli dohot na so uli (Aestetika)
Jaha : 2 Musa 31:1-6
- c. Manimbangi pangalaho dohot pambahenan taringot tu na denggan dohot na roa (Etika)
Jaha : Ep. 4:24-25

168. Molo buti aha ma na tama sipatupaon ni jolma di ngoluna?

Alus : Mamujimuji Debata jala mangoloi na nidokna dibagasan las ni oha, i ma : mangaradoti patikna, manaon dibagasan habengeton dohot mamelehon diri di jolo ni Debata.

Apil : Roma 12:12

169. Boasa pola dohononta : "i ma na tutu situtu"?

Alus : Na diparhatutu rohanta do hasintongan jala sitiopon ni rohanta do tongtong hata haporseaon i.

PONGGOL PADUAHON

170. Pajojor ma jolo hata haporseaon ponggol paduahon dohot lapatanna.

171. a. Hea do dibege ho hata Team SAR, i ma sapunguan halak na martugas mangalului halak na tarmara, isara ala ni kapal na madabu, kapal na harom, d.n.a.?

b. Hea do dibege ho hata sandera isara ni sada halak na rade mangalehon dirina tu halak, laho mangondihon donganna?

c. Hea dibege ho goar ni partogi bangso na digoari sipalua manang penyelamat ni bangso i? ise ma i? Sipalua sian dia do i?

172. Aha do parasingan ni haluaon na pinatupana i sian haluaon na pinatupa ni Jesus Kristus?

173. Boasa pola ingkon tobuson, manang paluaon ni Jesus i hita jolma?

Alus : Ala sude nunga tubu dibagasan dosa, jala ala dung olat ni dosa ni ompungta si Adam, tubu dibagasan dosa do hit ajala ndang tarbahren so ingkon mardosa hita. Nding tarbahren hita paluahon dirinta sian gongoman ni dosa!

174. Aha dipateanhon dosa ni ompungta si Adam i huroha tu hita pinomparna?

Alus : Hamatean, i ma hamatean ni daging dohot hamatean ni tondi manang hamatean salelengnilelengna.

175. Piga bagian bolon do hata haporseaon ponggol paduahonon?

Alus : Tolu bagian bolon do:

a. Taringot tu hadirion ni Tuhan Jesus, Anak ni Debata na paluahon hita sian dosa i.

b. Taringot tu ulaon panobusion ni Tuhan Jesus, i ma sitaononna ro di hamamatenana.

c. Taringot tu parbue manang panghorhon ni hamamate ni Tuhan Jesus, i ma haluaon sian dosa dohot hamatean.

176. Ise do goar ni sipalua hita? Jala aha do lapatan ni goar i?

Alus:

a. Jesus Kristus do goar ni Sipalua i.

b. Jesus, lapatanna : Sipalua, ala lbana do na paluahon pardosa sian dosanasida be dohot sian hamatean.

Jaha : Mat. 1:21

- c. Kristus, lapatanna : Na miniahan ni Debata, ala dimiahi Debata Ibana gabe Raja dohot Sintua ni Malim, dohot Panurirang di hita.

Jaha : Ul. 10:38

- d. Dos do lapatan ni Kristus dohot Mesias.
- e. Ibana do Anak ni Debata Jahowa na sasada i, na sinuruna tu portubi on laho paluahon angka pardosa.

Jaha : Joh. 3:16

177. Ala ni aha umbahen targoar Ibana 'Anak ni Debata' na sasada i?

Alus : Ala sahadirion Ibana dohot Debata Jahowa, jala Debata do nang Ibana.

Jaha : Joh. 10:30; Joh. 14:9

178. Antong, molo Debata do Ibana hape, dia ma pangalaho Ha-Debata-onNa dipaboa hata ni Debata tu hita?

Alus :

- a. Na so marmula na so marujung do Ibana.

Jaha : Joh. 17:5; Heb. 13:8

- b. Pargogo na so hatudosan do Ibana.

Jaha : Mat. 28:18

- c. Parbinoto na sun do Ibana.

Jaha : Joh. 2:24; Joh. 21:17

- d. Na sun badia do Ibana.

Jaha : Joh. 8:46

- e. Ibana do na manggohi saluhut.

Jaha : Mat. 18:20; Mat. 28:20

179. Sian dia deba nari tarida Ha-Debata-on ni Tuhan Jesus?

Alus : Sian ulaonna, i ma:

- a. Ditangihon do tangiang ni na martangiang tu Ibana.

Jaha : Joh. 14:14; Joh. 16:23b

- b. Disesa do dosa ni angka pardosa.

Jaha : Mat. 9:2

- c. Dipamalum do angka na martihas, jala dipangolu do angka na mate.

Jaha : Luk. 7:22; Joh. 5:21

- d. Diuhumi do nasa na mangolu dohot na mate.

Jaha : Joh. 5:22

180. Holan Jesus do anak ni Debata?

Alus:

- a. Ibana do anakNa, na tinubuhonna di na robi ni na robi, jala ro di salelengnilelengna do Ibana.
- b. Alai dohot do hita Anak ni Debata, ala ni Jesus Kristus.
Jaha : Rom 8:16
Apil : Gal. 4:6

181. Boasa digoari Ibana Kristus manang Mesias na marlapatan na miniahan?

Alus : Ala naung pinilit ni Debata Tuhan Jesus marhitehite Tondi Porbadia gabe Panurirang di hita dohot Sintua ni Malim na sumurung dohot Raja na manontong.

Jaha : Ul. 10:38; Luk. 24:19; Luk. 1:33

182. Aha do diula Tuhan Jesus, ala Panurirang Ibana?

Alus:

- a. Dipaboa do lomo dohot sogo ni roha ni Debata dohot dalam tu banua ginjang.
Jaha : Joh. 14:2-6
- b. Dipaboa do aha na naeng masa sogot marhitehite hatana dohot tanda na binahenna ro di parangena na so siinsahan.
Jaha : Luk. 7:16; Mat. 11:4-5; Mat. 24:25

183. Aha do diula Tuhan Jesus mangihuthon hamallmonna?

Alus:

- a. Dipelehon do dirina humophop hita.
Jaha : Heb. 7:24-26
- b. Diondihon hita tu Ama.
Jaha : Rom 8:33-34

184. Aha do hataridaan ni na 'Raja' do Tuhan Jesus?

Alus:

- a. Na marhuaso do Ibana di banua ginjang, di tano on dohot di banua toru pe.
Jaha : Mat. 28:18; Pil. 2:10-11; Pangk. 1:18
- b. Ibana manghatindanghon paboa na Raja do Ibana na manggomgomi dibagasan hasintongan.
Jaha : Joh. 18:37
- c. Ibana Ulubalang ni Debata naung manaluhon sibolis raja ni portibi on.

Jaha : Pangk. 12:10-11

185. Dia ma ulaon panghophopon ni Tuhan Jesus di hita marhitehite hatutubuna?

Alus : Debata hian do Ibana. Alai na gabe dos do Ibana songon hita jolma, tinubuhon ni boruboru si Maria di bara ni pinahan na di Betlehem, manang hapogosan, pardangolan, haleaon, gabe buni HadebataonNa, diahap Ibana do haraparon, hauason, tarunjun jala tumatangis.

Jaha : Pil. 2: 7-10; Heb. 2:17; 4:15

186. Dia do na nidokna 'tinubuhon ni si Maria andorang so habubuhan'?

Alus :

a. Paboahon ia Jesus i, ndada sian sangkap ni jolma tubu, ala tung sian Debata do.

Jaha : Joh. 1:13; Luk. 1:35

b. Patuduhon na so dibagasan dosa Ibana tubu.

187. Boasa ndang tarpajojo di panindangion haporseaon i sude barita ni ngolu ni Tuhan Jesus?

Alus : Ala nunga dihamham pananomom ni Jesus i, sude parngoluonna. Jala hamamatena di hau pinarsilang i do pangarimpunanna.

188. Antong dia ma lapatanna molo tadok 'manaon Ibana di hau pinarsilang'?

Alus : Na tadok disi;

a. Manaon Ibana so sian salana, gabe Ibana hona uhum dohot hona bura songon singkatta.

b. Asa gabe malua hita sian dosa, uhum, hamatean dohot hamagoan, hinorhon ni i gabe partohap hita di hangoluan salelengnilelengna.

Jaha : Heb. 9:14; Jes. 53:4; 1 Pet. 2:24-25

189. Boasa ingkon tadok 'di panguhumon ni si Latus'?

Alus : Dipatuduhon i do tu hita;

a. Na sintong do hamamatena i masa di sejarah ni portibi on.

b. Na sintong do muse hamamatena i diputushon sada panggomgomi na sah di portibi on, paboahon haputusan ni sude hajolmaon do i.

c. Sipaingot do i tu angka na marhuaso, paboa na diingot Debata do sude angka haputusan dohot panghorhonna di sejarah ni portibi on dohot hajolmaon.

Jaha : Dan 2:47

190. Boasa tahe taondolhon hamamatena di hau pinarsilang?

Alus:

- a. Ala hamatean di hau pinarsilang, i ma hamamatena na sumalin hombar tu 5 Musa 21:23: "Ai hona bura ni Debata do halak na targantung".
- b. Asa, ndang hamamate na somal hamamate ni Tuhan Jesus i.
- c. Ia hamatean di hau pinarsilang, i ma hamatean na so marsamari, ala mamboan i tihas dohot hilaon.

191. Dia ma na niomohon ni Tuhan Jesus di hita marhitehite angka na tinaonna i?

Alus:

- a. Hatutubuna tu banua toru.
- b. Hamumulakna mangolu manang haheheonna.
- c. Hananaekna tu banua ginjang.
- d. Parhundulna tu siamun ni Debata.
- e. Hamumulakna sogot laho manguhumi.

192. Dia do panghorhon ni hamamate ni Jesus i tu hita?

Alus : Ala naung ampe tu Jesus saluhut dosanta i, gabe nunga tigor hita di jolo ni Debata, na pinintoran ni mudar ni Jesus.

Jaha : 1 Joh. 1:7; 1 Joh. 2:2

193. Dia do parasingan ni hamatean ni Jesus sian hamamate ni jolma?

Alus : Ia hamamate ni Jesus, i ma hamamate na pamatehon hamatean, ai marhite hamamatena i dipasohot Ibana sorop ni hamatean i. Asa, ndada dos hamamate ni Jesus i dohot hamamate ni hita jolma. Ia hamamate ni jolma, upa tinuhor ni dosa do.

Apil : Rom. 6:23

194. Dia do lapatanna di na tadok "tuat tu banua toru dung ditanom"?

Alus:

- a. Dibolus Ibana hinajorbut ni hamatean na tahabiari i.
- b. Didalani Ibana do hamatean i, alai ndang margogo hamatean i manip Ibana.

Jaha : Pangk. 1:18

- c. Laos di huaso ni hamatean i ma dipatuduhon Ibana hamonanganna maradophon hamatean i.

Jaha : Ep. 4:8-10

- d. Asa ndang na tartaban Tuhan Jesus tu banua toru, alai ulubalang na monang do Ibana.

195. Dia do lapatan ni 'mulak mangolu di ari patoluhon'?

Alus:

- a. Gabe patar ma paboa na Anak ni Debata do Tuhan Jesus, na so tartiop hamatean i.
- b. Paboa naung sintong margarar sude utang dosa hamatean i jala naung dijalo Debata pelean pardenggan na pinatupa ni Jesus i.
Jaha : 1 Kor. 15:17
- c. Paboa hamonanganna naung ditaluhon Ibana harbangan ni banua toru jala ditiop anak hunsina.
Apil : Pangk. 1:8

196. Dia do silua tu hita sian haheheon ni Jesus i sian na mate?

Alus :

- a. Gabe patar ma tu hita jolma, naung talu hamatean, dosa dohot sibolis.
Jaha : 1 Kor. 15:55-59
- b. Gabe ndang sihabiaranta be hamatean i.
- c. Paboa na hehe do muse angka na porsea tu hangoluan na salelengna, hombar tu bagabagaNa.
Jaha : Joh. 11:25-26; 1 Kor. 15:22
- d. Haheheonna i gabe singkoram ni hasonanganta maralohon dosa dohot pangunjunan na sai jotot boi manaluhon hita.
Jaha : Rom 6:12-13

197. Aha do lapatan ni hananaek ni Tuhan Jesus tu banua ginjang?

Alus:

- a. Naung dipaujung Ibana ulaonna di portibi on.
- b. Na so di portibi on sambulo ni hita jolma.
Jaha : Pil. 3:14-20
- c. Na mangarade inganan do Iban adi angka na porsea i.
Jaha : Joh. 14:1-2
- d. Na mangondolhon hita do Ibana tu Ama i.
Jaha : Mat. 28:18; Joh. 14:3
- e. Na Ibana do mangunkap dalan tu banua ginjang di nasa na porsea di Ibana.

198. Dia do lapatan ni na nidokna "hundul Ibana di siamun ni Debata"?

Alus:

- a. Nunga sahat tu Ibana nasa huaso na di banua ginjang dohot na di tano on.
- b. Saluhut nunga dipatunduk Ibana tu toru ni patna jala Ibana dibahen gabe ulu ni saluhut Huria i.
Jaha : Mat. 28:18; Pil. 2:9-10; Ep. 1:20-22.
- c. Na Ibana do hasahatan ni nasa tangangta dohot pasintonghon tangiangta tu Ama i.
Jaha : Ep. 1:20-22; Rom 8:26
- d. Na Ibana gabe pangondianta tu Ama i dohot gabe pardenggan pасаehon dosanta.
Jaha : 1 Joh. 2:1-2

199. Asa, ndang be di tongatonganta Tuhan Jesus i nuaeng?

Alus : Di tongatonganta do, alai ndang tarida be Ibana songon andorang di tano on.

Jaha : Mat. 18:20

200. Aha do lapatan ni "mulak sogot tu tano on laho manguhumi halak na mangolu dohot na mate"?

Alus:

- a. Paboa Jesus Kristus do ujung ni portibi on dohot sejarah.
Jaha : Pangk. 1:8
- b. Paboa Jesus Kristus do na pahehehon angka na mate di ari sogot i.
Jaha : 1 Tes. 4:16-18
- c. Paboa na adong do ari uhum sogot jala Jesus Kristus panguhum disi.
Jaha : Mat. 25:31-34; Pangk. 20:11-5
- d. Paboa na lehononna do tu angka na porsea i hangoluan na salelengna, di langit dohot di tano na imbaru.
Jaha : Pangk. 21:1-4; 2 Pet. 3:13
- e. Jala nasa na so porsea, pasahatonna tu api naroko.
Jaha : Mat. 25:41

201. Dia ma apulapul sian panghirimon i tu hita?

Alus : Na Manahan ro di ujung i do paluaonna, ala ni i tatiop ma tongtong haporseaon i unang adong na mambuat tumpalna i.

Jaha : Mat. 24:13; Pangk. 3:11

PONGGOL PATOLUHON

202. Pajojor ma jolo panindangion haporseaon ponggol patoluhon i dohot lapatanna.
203. a. Hea do dibege ho taringot tu Tondi Porbadia?
b. Hea do ho dohot tu Pesta Haroro ni Tondi Porbadia?
c. Baritahon ma jolo na binegem taringot tusi!
204. Sian dia itaboto na sahadirion do Tondi Porbadia dohot Debata?
Alus : Sian goarna, pangalahona dohot ulaonna.
205. Ise do Tondi Porbadia?
Alus:
a. Ia Tondi Porbadia, i ma na sahadirion dohot Debata Ama, jala na so tarsirang hita hadirionna dohot Debata Anak huhut na so marmula jala na so marujung.
Jaha : Joh. 15:26
b. Na disuru do Ibana tu hita jolma, asa maruli hita marhite haporseaon na sintong di Tuhan Jesus, di na saluhut basabasaNa, huhut mangapuli, mangajari dohot mandongani hita ro di salelengnilelengna.
Jaha : Joh. 14:26
206. Ise do goarna didok Hata ni Debata?
Alus : Tondi ni Tuhan Jahowa, Tondi Hasintongan, Tondi Porbadia, Tondi Pangapuli, tondi ni Jahowa, Tondi Habisuhon dohot Hapistaran, Tondi ni Panaturion dohot Hagagoon.
Jaha : Jes. 61:1-2; Psl. 139:7; 2 Sam. 23:2; Jes. 11:2; Joh. 16:13
207. Songon dia do pangalaho ni Tondi Porbadia ?
Alus : Na Badia jala na sintong do Ibana, parbinoto na sun jala na saleleng ni lelengna do.
Jaha : Ul. 5:3-4; Heb. 9:14; 1 Kor. 2:10
208. Angka dia do ulaon ni Tondi Porbadia?
Alus :
a. Manjou dohot papunguhon hita tu Huria i marhite Barita na Uli
b. Manguduti ulain ni Tuhan Jesus.
c. Mangalehon asi ni rohana laho patiurhon rohanta.

- d. Pabadiahon rohanta.
- e. Patongtonghon rohanta asa marsiihit di bagasan haporseaon na ture.
- f. Manesa dosanta ganup ari.
- g. Pangoluhon hita di ari parpudi ro di nasa na mate.
- h. Mangondihon hita di ari parpudi tu Ama i huhut mangapuli hita.
- i. Mangajari hita mangido sipangidoonta tu Ama i.
- j. Pabangkithon angka partohonan di Huria i, asa tau tu ulaon ni Debata.
Jaha : Ul. 20:28; Ep. 4:11; Joh. 16:13-14; 1 Kor. 2:10

209. Holan i do ulaon ni Tondi Porbadia?

Alus : Nandang, Tondi Porbadia i do manjou, papunguhon angka na porsea, jala patongtonghon nasida di sada luhutan marhoar Huria na Badia.

Jaha : Ul. 2:17-21; Ep. 4:4

210. Boasa didok, ia ulaon ni Tondi Porbadia i ma laho manguduti ulaon ni Tuhan Jesus?

Alus:

- a. Ala Tondi Porbadia i do na pasahathon dohot manahaphon haluaon na pinatupa ni tuhan Jesus di angka na porsea i.
- b. Na mambahen bagas pangantusiona taringot tu dosa, hapintoron dohot uhum.

Jaha : Joh. 16:8-12

- c. Na pasangaphon Tuhan Jesus.

Jaha : Joh. 16:13-14

- d. Na mangondihon hita tu Ama i.

- e. Na mangula di bagasan roha dohot tondi ni jolma, paboa na tutu hita anak ni Debata.

Jaha : Rom 8:16

- f. Na pabadiahon hita.

Jaha : 1 Kor. 12:3

211. Beha do dibahen Tondi Porbadia i pabadiahon hita?

Alus : Dijou do hita, dipapungu, dipatiur, diparbadiai rohanta jala dipatongtong di Tuhan Jesus dohot di haporseaon na sasada i, na tigor i.

Jaha : Mat. 11:28-30; 2 Pet. 3:9; 2 Tes. 2:14

212. Marhitehite aha do hita dijou Tondi Porbadia ?

Alus:

- a. Dijou do hita marhitehite Barita na Uli, i ma marhitehite manangihon Hata ni Debata na binoan ni Parbarita na Uli.
Apil : Rom 10:14-15
 - b. Marhitehite na manjahai surat.
Jaha : Joh. 5:39
 - c. Marhitehite angka na manimbangi na masa na binahen ni Debata.
Jaha : Rom 1:19-21
213. Boasa dijou Tondi Porbadia i hita?
Alus : Asao lo hita mangido asi ni rohana na naeng lehononna, i ma hasesaan ni dosanta dohot hatigoran ni rohanta.
Jaha : Jes. 44:22; Mika 7:8; Ul. 10:43
214. Tu dia dipapungu Tondi Porbadia angka na jinouna i?
Alus : Dipapungu do nasida gabe sada Huria na Badia, i ma Huria Hatopan ni halak Kristen angka na badia.
215. Boasa digoar sada do Huria i?
Alus:
 - a. Ala daging ni Jesus Kristus do Huria i, sada do Huria i atik pe godang ruasna.
 - b. Ala hasadaon partondion do i, asing do sian hasadaon ni portibi isara ni partei, parkongsian dohot parsahutaon.
Jaha : Ep. 4:4; 1 Kor. 12:20; Joh. 17:20-21
 - c. Ala daging ni Kristus do huria i, ndang loason ni Debata talu HuriaNa di tano on paima ro ari parpudi.
Jaha : Mat. 16:8
216. Boasa digoari hatopan do Huria i?
Alus :
 - a. Ala punguan ni sude angka na badia do i naung partohap di Tuhan Jesus Kristus, sian nasa bangso, houw, marga dohot luat.
 - b. Marhite i gabe adong pardomuan ni angka Huria atik pe marasing-asing rumang ni agenda parpunguan dohot ruhut-ruhutna.
Jaha : Pangk. 7:9
217. Boasa digoari na badia do Huria i?
Alus:
 - a. Ala habadiaon ni Kristus do Ulu ni Huria i, ndang ala habadiaon ni angka ruasna.

- b. Ala tung apala Jesus Kristus do na pabadiahon HURia i, ndang ruas i sandiri.

Jaha : 1 Pet. 2:9; Ep. 2:22; Ep. 3:21; 1 Kor. 3:16

218. Aha dope na tahatindanghon taringot tu hata haporseaon on?

Alus : Tahatindanghon do na adong hasesaan ni dosa, i ma pangauhonon di haluaon na pinatupa ni Tuhan Jesus Kristus marhite pangulaon ni Tondi Porbadia.

219. Ise do na tarbahen dapotan hasesaan ni dosa?

Alus:

- a. Angka naung dipatiur rohana laho mananda dosana.
- b. Angka na mangarsakhon dosana jala na manghaporseai bagabagaNa.
- c. Na olo mangido asi ni roha ni Debata jala mangoloi hataNa.
- d. Na so olo be mandatdati mardosa.

220. Dia ma parsaulian ni halak naung sinesaan dosana?

Alus:

- a. Mate jolma na buruk i jala tubu jolma na imbaru gabe marpangalaho na imbaru marhitehite pangoloion di Debata.

Jaha : Hes. 36:26; Ep. 4:22-24

- b. Mardame ma Ibana dohot Debata jala boi mandonohi Debata.

- c. Marpanghirimon di hasangapon ni Debata.

- d. Jala tarbahensa marolopolop nang di bagasan haporseaon.

Jaha : Rom 5:1-3

221. Dia ma tanda ni na marpangalaho na imbaru?

Alus : Magigi mida dosa, burju jala ringgas patupahon lomo ni roha ni Debata jala diparbuehon parbue ni Tondi.

Jaha : Mat. 12:33; Gal. 5:22

222. Ringkot dope di hita hasesaan ni dosa i ganup ari?

Alus:

- a. Ringkot do, ai ala hagaleon ni jolma olo dope madabu tu dosa.

Jaha : Mat. 26:41

- b. Ai sai manggogo do sibolis i laho manirang hita sian Debata marhitehite hisaphisap na mangula di diri ni jolma.

Jaha : 1 Pet. 5:8

223. Sude do dosa disesa Debata?

Alus : Sude do dosa disesa, angka na tinean dohot na binahen holan dosa dampak Tondi Porbadia do ndang sesaonna.

Jaha : Jes. 1:18; Jes. 43:25; Mat. 12:31

224. Dia do lapatan ni dosa dampak Tondi Porbadia na so tarsesa i?

Alus : I ma halak na porsea hian di Tuhan Yesus alai marbalik nasida sian haporseaon i, jala dituntun mansoadahon pambahenan ni Debata na di bagasan rohana nasailaon.

Jaha : Heb. 6:4-7

225. Dia do lapatan ni hata "dipatongtong hita di Tuhan Yesus Kristus dohot di bagasan haporseaon na sasada i"?

Alus:

a. Dilehon tu hita hangoluan na salelengnilelengna gabe ndang mago be hita jala ndang tarrampas manang ise be hita sian tanganna.

Jaha : Joh. 10:27-28; Luk. 22:31-32

b. Dipatongtong hita di bagasan haporseaon marhite na marsihohot di Hata ni Debata, di parsaoan ni angka na badia di Huria i, di bagasan tangiang dohot ulaon na badia.

Jaha : Ul. 2:42

226. Aha dope debanari na tahatindanghon di hata haporseaon na patoluhon on?

Alus : Mulak mangolu do sohot daging ni halak naung mate dohot di hangoluan na so ra suda.

227. Tu dia do hita dung ro ajalta?

Alus:

a. Ila porsea hita, tu hasonangan do, alai na so porsea i tu hamagoan do.

b. Gabe tano do ianggo dagingta, alai pahehon ni Tuhan Yesus do i muse di ari parpudi.

Jaha : Joh. 5:28-29; Pil. 3:20-21; 1 Kor. 15:42-44

228. Aha debanari na masa di ari parpudi i?

Alus:

a. Ro ma Tuhan Yesus mardongan hasangapon godang.

b. Hehe ma angka na mate, jala marluhut ma nasa bangso di jolo ni habangsana.

c. Uhumonna disi nasa jolma hombar tu na niulana be.

d. Boannonna ma angka na porsea tu langit dohot tano na imbaru.

Jaha : 1 Tes. 4:16; Mat. 25:31-46; Pangk. 20:12; 2 Pet. 3:13; Pangk. 21:1-8

229. Dia do lapatan ni hangoluan na so ra suda?

Alus:

- a. Malua sian dosa dohot sian jea ni portibi on.
- b. Manontong di lambung ni Tuhan Jesus.
- c. Jaha : Pangk. 7:16-17; Mat. 13:43; 1 Kor. 2:9

230. Tu dia do angka na so porsea di Tuhan Jesus Kristus?

Alus : Tu hamagoan salelenglelengna do, i ma inganan ni angka na pinabali ni Debata, na satohap rap dohot sibolis i, jala ndang marujung be na bernit sian nasida arian dohot borngin.

Jaha : Mark. 9:43-46; Pangk. 20:10-15

231. Aha do lapatan ni "Amen" di ujung ni hata haporseaon i?

Alus : I ma na tutu situtu, ala taparhatutu, hasintongan do sude na itapajojor di hata haporseaon i, jala sitiopan ni rohanta do i, saleleng hita mangolu.

Apil : Rom 8:38-39

paragodungan.org

**TANGIANG NA NIAJARHON
NI TUHAN JESUS**

paragodungan.org

HATA PAMUKAAN

Ale Amanami na di banua ginjang!

Dia do lapatan ni i?

On do : Apoapo ni Debata do i tu hita paboa Amanta situtu lbana jala anakNa situtu hita, asa pos rohanta mangido tu lbana songon pos ni roha ni dakdanak na mangido tu amana.

SIPANGIDOON PARJOLO

Sai pinarbadia ma goarMu!

Dia do lapatan ni i?

On do : Na bagia hian do goar ni Debata alai naeng ma badia goar ni Debata idaon ni rohanta, i do na itapangido disi.

Beha do pangalahona?

Songon on do : Molo polin Hata ni Debata pinodahon, unang adong na lipe, dung i molo badia parangenta songon parange na tama parange ni angka anak ni Debata, jadi ma i. "Ale Amanami na di banua ginjang sai urupi ma hami asa tung songon i hami." Alai manang ise hita on na mamodahon poda jala na marparangehon parange na lipe sian na nidok ni Debata, i do na paroahon goar ni Debata. "Ale Amanami na di banua ginjang, ramoti ma hami, asa unang tung songon i hami!"

SIPANGIDOON PADUAHON

Sai ro ma harajaonmu!

Dia do lapatan ni i?

On do : la harajaon ni Debata, sai na ro do i nang so itapangido alai asa haru sahat ro tu hita on i do na itapangido disi.

Beha do pangalahona?

Songon on do: Dilehon Amanta na di banua ginjang i do tu hita Tondi Porbadia i, asa porsea hita di hatana na badia i hinorhon ni asi ni rohana jala asa itaparangehon parange ni Debata di ngolunta on dohot di hangoluanta sogot salelenglelengna.

SIPANGIDOON PATOLUHON

Sai saut ma lomo ni roham di banua tonga on songon na di banua ginjang!

Dia do lapatan ni i?

On do : la roha ni Debata na denggan jala na marasi i, na saut hian do nang so itapangido, alai asa tung saut rohana di hita on, i do na itapangido disi.

Beha do pangalahona?

Songon on do : Molo disegai jala disundati Debata nasa tahi dohot lomo ni roha ni angka na jahat i angka roha ni sibolis i dohot roha ni hajolmaon dohot roha ni dagingta angka na naeng manundati harajaon ni Debata jala na naeng mangambati hita, asa unang diparbadia i rohanta goar ni Debata. Angkup ni i molo dipargogol jala dipatongtong lbana hita hot di hatana dohot di haporseaonta i, rasirasa mate hita. Ido asi ni roha ni Debata dohot lomo ni rohana.

SIPANGIDOON PAOPATHON

Lehon ma tu hami hangoluan siapari!

Dia do lapatan ni i?

On do : Dilehon Debata do nian hangoluan siapari dohot tu halak na jahat i, nang so itapangido alai asa dipaingot Debata hita marhatopothon asi ni rohana asa mandok mauiate hita tu lbana din a manjalo hangoluan siapari hita sian lbana. I do na itapangido disi.

Dia do lapatan ni hangoluan siapari?

Sipanganon do i dohot siinumon dohot parabiton dohot arta dohot bagas dohot dongan saripa na burju dohot ianakhon na burju, ro di angka naposo ro di raja na tigor roha dohot uhum na sintong, dohot ari na hasea dohot dame, dohot dongan sahuta na ture, ro di nasa na hasea di hajolmaon.

SIPANGIDOON PALIMAHON

Sesa ma dosanami songon panesanami di dosa ni dongan na mardosa tu hami.

Dia do lapatan ni i?

On do : itapangido asi ni roha ni Amanta na di banua ginjang i, asa angglat unang dijujur dosanta, jala asa anggiat unang biasan rohana, ala ni dosanta i, mangoloi na itapangido sian lbana. Ai apala tama lehononna nian tu hita

na itapangido dibahen na so ture i parangenta i, i do na tama, alai sai asi ma rohana dilehon ma tu hita na itapangido, ai hit ape, na olo do hita dohot nasa rohanta manesa dosa ni angka na mardosa tu hita dohot sumuan uhum na denggan tu nasida.

SIPANGIDOON PAONOMHON

Unang hami togihon tu pangunjunan.

Dia do lapatan ni i?

On do : la Debata ndang adong manang ise nian diunjuni, alai asa sai diramoti Debata hita asa unang diansi sibolis i manang hajolmaon manang roha ni dagingta i hita, jala asa unang olo hita manopot pandelea manang haurahon dohot hajahaton na asing, dung i molo tung adong sisongon i rot u hita asa ditumpak hita monang. I do na itapangido disi.

SIPANGIDOON PAPITUHON

Palua ma hami sian pangago.

Dia do lapatan ni i?

On do : Itapangido sian Debata hadadao ni nasa hamagoan ni daging dohot tondi dohot pansamotan dohot hasangapon; angkup ni i itapangido sian Debata, hasonangan lehononna tu hita di hasusuda ni bohalta sai asi ma rohana diboan ma hita sian rura hasusaan on tu banua ginjang tu lambungna. I do na tapangido disi.

UJUNG NI TANGIANG

Ai Ho do nampuna harajaon dohot hagogoon ro di hasangapon salefeng ni lelengna. Amen.

Dia do lapatan ni i?

Na mandok on do : Olo i ma tutu, jumpang ho ma na pinangidom. Umbahen na didokhon hita mandok 'Amen', asa tung porsea rohanta naung lomo situtu roha ni Amanta na di banua ginjang i manangihon tangiangta i, diparbagabaga do oloanna na itapangido, ai lbana do mandokhon hita mangidohonsa sian lbana.

paragodungan.org

**SUNGKUNSUNGKUN DOHOT ALUS TARINGOT TU TANGIANG NA
NIAJARHON NI TUHAN JESUS**

232. a. Hea do ho martangiang?
b. Hea do diida jala dibege ho halak na martonggo?
c. Aha do parasigan ni na martangiang sian na martonggo?
d. Boi do dihilala roham hinaringkot ni na martangiang?
e. Baritahon ma jolo taringot tu na nialamanmu sandiri taringot tusi.
233. Antong aha do tangiang?
Alus : la tangiang, i ma panghataion ni rohanta dohot Debata lago pasahathon dirinta tu Ibana, huhut mangido na ringkot di hita nang tu angka dongan pe dohot mamuji Debata.
Jaha : Psalmen 19:15; 1 Tim. 2:1
234. Tu ise do hota martangiang?
Alus : tu Debata Ama, Anak dohot Tondi Porbadia.
235. Boasa pola martangiang hita?
Alus:
a. Ala tona ni Debata sandiri do.
b. Ala hahuranganta dohot hagaleonta.
c. Ala ringkot do hita mandok mauiliate tu Debata siala pasupasuNa naung tajalo.
d. Ala tudos tu rupana dohot tu pangalahona do ditompa Debata jolma i, dibahen i ingkon marparsaoran dohot martangiang jolma i tu Ibana.
Jaha : Psl. 50:15; Mat. 7:7-8; Psl. 106:1; Mark. 11:24
236. Ingko sadihari do hita martangiang?
Alus : Manang sadihari pe, jadi do; alai denggan do pahotonta tingki partangiangonta: Manogot dung hehe, bodari lago modom, nang lago mangan dung sidung mangan, laos songon i muse di na lago mamungka dohot di na paujunghon nasa ulaon.
Jaha : 1 Tes. 5:17; Psl. 63:7; 5 Musa 8:10; Ep. 5:20
237. Marimbar do inganan partangianganta, asa tangihonon ni Debata tangiangta?

Alus : Ndang marimbar, na boi do manang di dia hita martangiang asal ma sian nasa rohanta. Unang ma martujuan na sala songon Parise i, holan asa gabe sitotonduran manang sitontonon ni halak.

Jaha : Joh. 4:21-23; 6:1

238. Tongtong do dialusi Debata tangiangnta?

Alus : Tongtong do, alai ndang tongtong sai na hombar tu lomo ni rohanta dilehon.

Jaha : Jak. 4:3; Rom. 12:12; 2 Kor. 12:7-9

239. Ingkon songon dia do rohanta martangiang?

Alus : Ingkon pungu, daulat, serep jala porsea rohanta.

Jaha : Mat. 6:6-7; Poda 15:8; Jak. 1:6

240. Nunga taboto aha do tangiang. Songon dia parturena martangiang naeng ajaran ni Tuhan Jesus dope hita marhite tangiang "Ale Amanami"

Tarbagi piga do tahe tangiang na niajarhon ni Tuhan Jesus i?

Alus : Tolu bagian do: Hata Pamukaan, Sipangidoon na pitu i, dohot ujung ni tangiang i.

241. Pajojor ma jolo hata pamukaan ni tangiang i dohot lapatanna.

242. Boasa diajari Tuhan Jesus hita mandok Ama tu Debata?

Alus : Ala anakNa situtu do hita dibagasan Jesus Kristus dohot Tondi Porbadia.

Jaha : Rom 8:14-17

243. Boasa dohononta 'Amanami' ndang Amang?

Alus : Asa tongtong itaingot manangianghon nang dongan pe, unang holan dirinta sandiri, ai sude do hita dongan sabagas ni Debata jala rap maramahon Debata.

Jaha : Ep. 2:19

Apil : Mat. 5:44

244. Boasa diajari Tuhan Jesus hita mandok 'Ale Amanami na di banua ginjang'?

Alus : Laho paingothon hita do i di habalgaon ni Debata, i ma hasangaponNa dohot hagagoonNa na mangatasi saluhut.

SIPANGIDOON PARJOLO

245. Pajojor ma jolo sipangidoon parjolo dohot lapatanna dohot pangalahona.
246. a. Boasa maol rohanta manggoari goar ni natorasta?
b. Molo ingkon goaranta ma, aha do parjolo tadok andorang so tadok goarna i?
c. Ra, muruk do ho molo diparmeammeeam halak goar ni natorasmu, boasa? Ala sangap do goarna i tarajumi manang ala na badia do?
d. ditolopi ho do, molo diparmeammeeam halak Goar ni Debata? Boasa?
e. Songon dia do didok di patik patoluhon i taringot tu Goar ni Debata?
f. Ingkon beha do goar ni Debata rajuman ni rohanta di sipangidoon parjolo on?
247. Antong molo songon i ingkon pola hita huroha pabadiahon Goar ni Debata na badia i?
Alus : Ndada pola hita nian pabadiahon Goar ni Debata, ai nunga badia hian Ibana, alai asa badia Ibana diida rohanta, i do na itapangido disi.
Jaha : Jes. 6:5; 1 Petr. 3:15
248. Songon dia do ngolu ni na pabadiahon Goar ni Debata?
Alus:
a. Polin dipodahon Hata ni Debata ndang marlaok
Jaha : 5 Musa 4:2
b. Dipataridahon di ngoluna siganupari na sai marojahan tu Hata ni Debata do ibana.
249. Tarpatupa hita do i sian gogonta sandiri?
Alus : Ndang tarpatupa hita i, ala ni i do umbahen na rongkot pangidoonta: "Ale Amanami na di banua ginjang, sai urupi ma hami, asa tung songon i hami".
250. Aha do lapatan ni mamodahon polin Hata ni Debata?
Alus : Ndang jadi ambaan tu hata naung tinonahon ni Debata jala ndang jadi oruan sia i, alai ingkon radotan do angka tona ni Debata naung ditonahon i.
Jaha : 5 Musa 4:2
251. Ise do angka na so pabadiahon Goar ni Debata?
Alus : Angka na mamodahon lipe Hata ni Debata jala na mamarangehon lipe sian na nidok ni Debata.

Jaha : Psl. 50:16-17; Rom 2:23; Gal. 1:8

252. Aha do lapatan ni mamodahon lipe Hata ni Debata?

Alus : Olo jala ringgas rohana mamodahon Hata ni Debata alai dihagigihon jala ditundalhon na pinodahonna i.

Jaha : Psl. 50:16-17

SIPANGIDOO PADUAHON

253. Pajojo ma jolo sipangidoon paduahon, lapatanna dohot pangalahona.

254. a. Godang do angka huasohuaso di portibi on na mangarajai roha ni jolma. Isara ni hepeng, hasipelebeguon, morphin, alcohol. Beha do diida ho ngolu ni jolma na nirajaan ni angka i?

b. Dia dope na mangarajai roha ni jolma di tingki on?

c. Tontu do ia ngolu ni jolma na nirajaan ni angka i ndang marhasonangan, ala ni i harajaon dia do na ringkot pangidoonta sian Debata asa marhasonangan jolma i?

255. Angkup ni i adong do di portibi on harajaon, isara ni harajaon Majapahit najolo, dia do parasingan ni i tu Harajaon ni Debata?

Alus : Ia harajaon na di tano on, i ma sada luat dohot sada bangso na tontu na nirajaan ni sahalak raja manang parhuaso. Harajaan ni Debata asing do sian harajaon portibi on. Ndang holan sada bangso na tontu nigomgomana, alai nasa na adong do. Dihamham i do harajaon na di portibi on.

256. Piga ragam do Harajaon ni Debata?

Alus : Dua ragam do.

a. Harajaon huaso, i ma panggomgomion ni Debata di nasa na adong. Sude do na tinompa masuk tusi.

Jaha : Psl. 103:19

b. Harajaon asi ni roha, i ma panggomgomion ni Debata marhitehite Jesus Kristus dohot Tondi Porbadia. Masuk tusi do nasa naung dapotan asi ni roha ni Debata, i ma angka naung taruli di hasesaan ni dosana dohot Tondi Porbadia.

Jaha : Mat. 3:2; Rom. 4:7

257. Antong, haroro ni harajaon dia do na itapangido di sipangidoon paduahon on?

Alus : Haroro ni harajaon asi ni roha do, i ma asa lam ganda torop ni angka na porsea di Tuhan Jesus.

Jaha : Mat. 28:19

258. Dia do tandana, paboa naung ro Harajaon ni Debata tu hita?

Alus : Di pangalehon ni Debata di Tondina tu bagasan rohanta. Dihorhon i do di ngolunta panghaporseaion di Hata ni Debata dohot roha na olo mamarangehon parange na denggan na hinalomohon ni roha ni Debata.

259. Aha do na mangihut tu Harajaon ni Debata na pinungkaNa dibagasan rohanta saleleng di ngolunta on hita?

Alus : Hasangapon salelengna do udutna, sijaloon ni angka na masuk tu Harajaon ni Debata saleleng di ngolu on.

Jaha : Dan. 7:18; Mat. 25:34

SIPANGIDOO PATOLUHON

260. Pajojo ma jolo sipangidoon patoluhon, lapatanna dohot pangalahona.

261. a. langgo hita jolma, nda sai lomo ni rohanta do na ingkon saut?

Haru lomo n roha ni natorasta, gurunta sai taalo do!

Denggan do tahe na songon i?

Manang asal oloan do lomo ni rohanasida?

Lehon ma jolo pandapotmu!

- b. Adong do dua paraloan ni lomo ni roha, na sai marhusari dibagasan roha ni jolma.

Dia ma i tahe?

Lomo ni roha ni ise do jotjotan saut taulahon?

Lomo ni roha ni ise do na tapangido asa saut di sipangidoon patoluhon on?

262. Ai beha do lomo ni roha ni Debata?

Alus : Na denggan jala na marasi.

Jaha : Jes. 55:8-9

263. Dia do huroha lomo ni rohaNa na denggan i?

Alus : Asa dapotan haluaon sandok manisias, na porsea di Ibana.

Apil : Joh. 6:40

264. Beha do bahenonta asa satu lomo ni roha ni Debata tu hita?

Alus : Ingkon mian hita di bagasan Tuhan Jesus, mandok : Taulahon na nidokNa jala itahasogohon na nioraanNa songon na nidokNa di Patik na sampulu i.

Jaha : Joh. 15:4; Jes. 48:18

265. Ise do na mangurupi hita pasauthon lomo ni roha ni Debata?

Alus : Debata sandiri do.

266. Beha do dibahen Debata mangurupi hita?

Alus : Disegai jala disundati nasa tahi ni angka na jahat dohot lomo ni roha ni sibolis nang roha ni subukta pe; jala dipargogoi huhut dipatongtong hita di bagasan hataNa dohot haporseaonta rasirasa mate hita.

Jaha : Joh. 17:15; 1 Kor. 1:18; 2 Tes. 3:3

SIPANGIDOON PAOPATHON

267. Pajojo ma jolo sipangidoon paopathon dohot lapatanna.

268. a. Sudejolma do tahe di portibi on adong hangoluanna siapari?

b. Hea do diida ho pangidoido manang halak na loja mangalului hangoluan siapari?

c. Alai diboto ho do na adong dojolma na marlobilobi di ngolu siapari?

d. Aha do na mambahenjolma hurangan dohot lomoan di ngolu siapari di tingki on?

Ala ni tano na hurang manang na marlobilobi do?

Ala ni haringgason manang halosohon mangula do?

Ala ni haotoon manang hapistaran do?

Diskusihon ma jolo i.

269. Aha do sasintongna na hurang dijolma i umbahen na adong na hurangan dohot na marlobilobi di ngolu siapari?

Alus :Roha na masitangiangan, na masitatapan dohot na masiutupan do na hurang dijolma i.

Roha diri do na sai tong hapal dijolma i.

270. Ala ni i, aha do sipangidoonta di sipangidoon paopathon on?

Alus : Lehon ma di hami hangoluan siapari!

271. Boasa diajari Tuhan Jesus hita mandok : "Lehon ma di hami"?

Alus : Asa unang holan dirinta sambing tasarihon, alai asa masitangiangnan dohot masitatapan hita sama hita.

Jaha : Heb. 13:16

272. Boasa holan hangoluan sasadari pangidoonta?

Alus : Asa taboto na sian Debata do hangoluanta i ganup ari na patut sihasabamhononhon dohot sisagihononta tu dongan jolma na hurangan dohot sihamauliatehononta tu Debata. Jala asa unang lalap hita paingotingot parngoluon di tingki na salpu dohot tu tingki na naeng ro.

Jaha : 1 Tim. 6:7-8

273. Angka dia do na gonoaran hangoluan siapari?

Alus : Nasa na hasea di hita di hangoluan on, i ma: Na ringkot di pamatang, parsauran dohot di portondion.

274. Boasa sian Debata pangidoonta hangoluan siapari?

Alus:

a. Ala Ibana na marhuaso mangalehon jala asa taokui:

b. Aut so Ibana mamasumasu ulaonta i, magopo sambaing do halojaonta.

Jaha : Jer. 5:24

Apil : Ul. 14:17

c. Asa taingot na sian Debata do nasa na hasea di hita jala asa taboto muse mandok mauliate tu Ibana.

275. Adong do sibahenonta pasauthon siangidoon on?

Alus:

a. Adong do, i ma manghaburjuhon ulaon na pinasahat ni Debata tu hita huhut manangianghonsa.

Jaha : 2 Tes. 3:10-12; Luk. 5:1-11b

b. Padaohon roha holso dohot ahu.

Jaha : Mat. 6:34; Luk. 12:16-21

276. Ingkon boha rohanta manjalo silehonlehon ni Debata?

Alus : Ingkon mardongan mauliate rohanta manjalosa, nang pe otik manang godang dilehon.

Jaha : 5 Musa 8:10; Psl. 118:1

SIPANGIDOON PALIMAHON

277. Pajojo ma jolo sipangidoon palimahon dohot lapatanna.
278. a. Beha do pangkilalaanmu molo mardosa ho dampak donganmu?
b. Beha do muse pangkilalaanmu mamereng donganmu na mardosa dampak ho?
c. hea do ho martangiang laho mangido hasesaan ni dosam dohot dosa ni donganmu na mardosa tu ho?
d. Antong molo songo i, aha do na ringkot sipangidoonta di sipangidoon palimahon on?
279. Aha na itaparhatutu di sipangidoon on?
Alus : Itaparhatutu do na dibagasan dosa do hita tubu jala holan na jat do tubutubu ni rohanta dohot pingkiranta.
Jaha : Psl. 51:7; 1 Musa 6:5; 1 Musa 8:21
280. Songon dia do tama nian bahenon ni Debata tu hita ala ni dosanta?
Alus : Tama nian jujuronna dosanta dohot pinsangonna hita jala biasan rohana mangoloi na itapangido.
281. Antong aha na itapangido disi?
Alus : Itapangido do asi ni roha ni Amanta na di banua ginjang i, i ma hasesaan ni dosanta.
Jaha : Psl. 51:9
282. Aha siingoton ni rohanta laho mangido asi ni roha?
Alus : Ingkon olo hita sian nasa rohanta manesa dosa ni dongan na mardosa tu hita dohot sumuan uhum na denggan tu nasida.
Apil : Rom 12:21
283. Dapotan hasesaan ni dosana do angka na so olo manesa dosa ni donganna?
Alus : Ndang dapot, ai didok Tuhan Yesus do : “Anggo so disesa hamu sala ni halak na dampak hamu, ndang season ni Amamuna nang dosamuna.
Jaha : Mat. 6:14-15
284. Aha ma sipareahanta marhite tangiang on?
Alus : Asa unang taparsineang asi no roha ni Debata na manesa dosanta i, jala asa unang tadatdati mangulahon dosa.
Jaha : Rom 6:1-2
Apil : Luk. 17:4; Mat. 18:21-22

SIPANGIDOON PAONOMHON

285. Pajojo ma jolo sipangidoon paonomhon dohot lapatanna.
286. a. Di sude inganan dohot tingki do tahe boi jumpang hita pangunjunan?
b. Angka aha ma na boi mangunjuni hita?
c. Dihilala roham do, ia angka gambaran na so hasea, hata pargaiton, ende na rumar na boi do manghorhon pangunjunan?
d. Hea do dielaela donganmu ho asa gabe margabus manang mananko? Nda hamagoan do panghorhon i?
e. Antong molo songon i do hape, aha do na ringkot sipangidoonta di tangiang on?
287. Piga ragam do pangunjunan na olo songgop tu hita?
Alus : dua ragam do;
a. Pangunjunan na manghorhon na denggan.
b. Pangunjunan na manghorhon dosa.
288. Dia do pangunjunan na manghorhon na denggan?
Alus : I ma pangunjunan na papitahon haporseaon marhite sitaonon dohot harugian.
Apil : Jak. 1:2
289. Dia di pangunjunan na manghorhon dosa?
Alus : I ma pangunjunan na manghorhon ganggu ni roha, pandeleaon dohot ragam ni hajahatan.
Jaha : Mat. 27:3-10
290. Sian pangunjunan dia paluaon ni Debata hita hambat tu na itapangido di sipangidoon on?
Alus : Sian pangunjunan na manghorhon dosa.
291. Antong aha do na tapangido sian sipangidoon on?
Alus : Asa diramoti Debata hita, molo tung songgop tu hita pangunjunan sisongon i; dipalua Debata hita muse jala ditumpak hita asa monang.
Jaha : 1 Kor. 10:13

SIPANGIDOON PAPITUHON

292. Pajojor ma jolo sipangidoon papituhon dohot lapatanna.
293. a. Hea do ho diago panamun manang donganmu sandiri?
 b. Angka dia do na jotjot mangago hita di tingki on?
 c. Dihilala roham do na so tuk gogonta sandiri paluahon hita sian angka pangago?
 d. Antong molo songon i, aha di sipangidoonta di sipangidoon papituhon on?
294. Ise di sipangago na nidokna di sipangidoon on?
 Alus : Sibolis, angka parjahat na manihuthon ibana dohot hisaphisap ni rohanta sandiri do.
295. Hamagoan dia huroha diparo tu hita?
 Alus : Hamagoan ni daging, tondi pansamotan dohot sahala.
296. Tu ise pangidoonta haluaonta sian angka i?
 Alus : Tu Debata do, ai lbana pargogo na so hatudosan na tuk mangaramoti dohot paluahon hita.
297. Beha dibahen Debata paluahon hita sian hamagoan di tingki on?
 Alus : Ditamparhon do i sian hita asa unang songgop tu hita.
 Dipargogoi jala dipabenget do hita manaon ia tung sura pe songgop i tu hita, jala diramoti do hita asa unang mago hita bahenon ni pangago i.
 Jaha : Psl. 121:5-8; 68:20-21; 42:6; Job. 1:12
298. Beha do dibahen Debata paluahon hita sian hamagoan sogot?
 Alus : Dipalua Debata hita sian biar mida hamatean i, ala nunga ditaluhon Tuhan Jesus hamatean i marhite haheheonNa jala dipapos rohanta manghirim di haheheon sogot i.
 Jaha : Psl. 23:4-6; Joh. 11:25; Pangk. 14:13b

UJUNG NI TANGIANG I

299. Pajojor ma jolo ujung ni tangiang i.
300. Aha do lapatan ni ujung ni tangiang i?
 Alus :
 a. Panindangion do i, paboa na pargogo na so hatudosan do Debata na boi paauthon sude na itapangido di tangiang i.

- b. Bagabaga do i asa pos rohanta, paboa na olo do Ibana mangalehon na itapangido.
 - c. Pujipujian do i tu Debata, paboa parholong roha Ibana na manggomgomi langit dohot tano on.
301. Aha do na pinaboa ni ujung ni tangiang i?
- Alus : Dipaboa do alana umbahen na tu Debata tapasahat sipangidoonta, na pitu i, i ma Ibana do na tarbahen mangalehon saluhutna i. Ibana do nampuna harajaon, hagagoon, dohot hasangapon.
302. Dia do lapatan ni Amen?
- Alus : Olo i ma tutu, jumpang ho ma na pinangidom.
303. Boasa didokhon hita mandok i?
- Alus : Asa tung porsea rohanta naung lomo situtu roha ni Amanta na di banua ginjang i manangihon tangiangta i. diparbagabaga do muse oloanNa na itapangido, ala Ibana do mandokhon hita mangidohonsa sian Ibana

paragodunggan.org

ULAON NA BADIA

SUNGKUNSUNGKUN DOHOT ALUS TARINGOT TU ULAON NA BADIA

304. Hea do dibege ho hata Sakramen? Aha do lapatan ni i?

Alus : Ia hata Sakramen na marharoroan do i sian hata Latin, i ma Sacramentum, na dipangke laho manggoari Ulaon na Badia.

305. Aha do Ulaon na Badia manang Sakramen hombar tu Panindangion Haporseaon ni HKBP?

Alus : Holan dua do Sakramen na pinatikhon ni Tuhan Jesus siradotanta, i ma Pandidion na Badia dohot Parpadanan na Badia. I ma na niaturhon ni Tuhan Jesus tu HuriaNa laho pasahathon marhite tanda na tarida asi ni rohaNa na so tarida, i ma hasesaan ni dosa, haluaon, hangoluan, dohot hasonangan, na niauhon marhite haporseaon.

Jaha : Mat. 28:19; Mark. 16:15-16; Mat. 26; Mark. 14; Luk. 22; 1 Kor. 11:17-34

306. Ise do na mamatikhon asa targoar Ulaon na Badia?

Alus : Ingkon Tuhan Jesus do.

307. Aha do na ringkot asa targoar Ulaon na Badia?

Alus : Hata ni Debata na mandokhon ulahononhon dohot bagabaga ni Debata taringot tu panghorhonna.

308. Dia do asi ni roha ni Debata na pinarbagabagahonna?

Alus : Hasesaan ni dosa, haluaon, hangoluan dohot hasonangan.

309. Piga do ulaon na badia dipatikhon Debata di Padan na Robi?

Alus : Dua do;

a. Parsunaton. Jaha : 1 Musa 17:10-14

b. Birubiru Paskah. Jaha : 2 Musa 12:1-28

310. Piga do 'Ulaon na Badia' dipatikhon Tuhan Jesus di Padan na Imbaru?

Alus : Dua do;

a. Pandidion na Badia singkat ni parsunaton.

Jaha : Mat. 28:18-20; Kol. 2:11-13

b. Parpadanan na Badia singkat ni birubiru Paskah.

Jaha : Mat. 26:26-29; Heb. 9:13-15

311. Antong ise do na marsuru hita patupahon pandidion i, jala pasohothon parsunaton ni halak Kristen?

Alus:

- a. Tuhan Yesus sandiri do na marsuru manang na mamatikhon i, din a laho manae Ibana tu banua ginjang, ai didok: "Laho ma hamu, podia hamu ma saluhut bangso jala didi hamu . . . Mat. 28:19."
 - b. Rapot ni angka Apostel i di Jerusalem do na mamutushon na so pola sunaton angka halak Kristen na ro sian sipelebegu.
Jaha : Ul. 15; 21:20+26
 - c. Ai ndada parsunaton ni pardagingon na ringkot, alai haimbaruon na sian Kristus i do.
312. Boasa maruba Parmanganon Birubiru Paskah gabe Parpadanan na Badia?
Alus:
- a. Ia Parmanganon Birubiru Paskah, i ma parningotan di haluaon ni bangso Israel sian parhatobanon na di tano Mislir tu tano Kanaan. Debata do na patupahon haluaon i.
 - b. Ia Parpadanan na Badia, i ma mangan roti parhitean ni daging ni Tuhan Yesus Kristus dohot minum anggur parhitean ni mudar ni Tuhan Yesus Kristus. Songon Birubiru Paskah na imbaru do i asa tu hita hasesaan ni dosa, hangoluan dohot hasonangan.

PANDIDION NA BADIA

Aha do lapatan ni pandidion i?

Ia pandidion i ndada holan aek sambaing, aek na marsaot hata ni Debata do aek i; ai tona ni Debata do umbahen na binuat aek i.

Beha do pandok ni Debata?

Didok Tuhanta Jesus Kristus di ujung ni surat na sinurathon ni si Mateus : Laho ma hamu, podia hamu saluhut bangso, didi hamu ma nasida tu bagasan goar ni Ama, Anak dohot Tondi Porbadia.

Aha do uli sian pandidion i?

On do : Saluhut halak na porsea di Hata ni Debata dohot dibagabagana, dapotan hasesaan ni dosa, dapotan dohot haluaon sian hamatean dohot sian sibolis ala dapotan hasonangan salelenglelengna.

Dia ma didok Debata bagabagana?

Didok Tuhanta Jesus Kristus do di ujung ni surat na sinurathon ni si Markus : Na porsea jala tardidi dapotan haluaon alai na so porsea i, hona uhun do.

Beha do pangalaho ni aek i umbahen tung dihothon i ulaon na sai godang?

Apala hinorhon ni aek i, na hinorhon ni Hata ni Debata do i, mandongani aek i dohot haporseaonniba na marhatutuhon mardongan Hata ni Debata aek i, ai anggo so Hata ni Debata dongan ni aek i, aek sambing do i, ndang tardok pandidion, alai ia Hata ni Debata dongan ni aek i, tardok ma pandidion aek i.

Na suksuk do asiasi di aek hangoluaon i; ai pandidion paimbaruhon hatutubu do aek i honorhon ni Tondi Porbadia. Ai songon on do didok si Paulus di suratna tu si Titus di bindu patoluhon: Dipangolu Debata do hita merhitehite pandidion paimbaruhon hatutubu binahen ni Tondi Porbadia na nilehonna i, dihabuashon asi ni rohana, jala asa di hita hangoluan na so ra suda songon na hinirim ni rohanta i. I do na tutu situtu.

Dia do lapatan ni na mandidi?

On do : Siauponta do ganup ari hinorhon ni solsol ni roha dohot hinorhon ni na paimbaruhon roha isara ni ompunta si Adam rap dohot dosanta ro di angka sangkap ni roha na jahat asa mate sudena jala asa mulak mangolu hita ganup ari gabejolma na imbaru, na tigor jala na ias roha, na mangolu di kolo ni Debata salelenglelengna.

Di dia do tarsurat hata i?

Didok si Paulus do di suratna tu halak Rom i di bindu paonomhon: Na tartanom do hita rap dohot Ibana marhitehite pandidion i tu bagasan hamatean, asa marparange hita di bagasan ngolu na imbaru, songon Kristus naung hehe sian angka na mate hinorhon ni hasangapon ni Amana.

SUNGKUNSUNGKUN DOHOT ALUS TARINGOT TU PANDIDION NA BADIA

313. a. Hea do diida ho acara pelantikan Kepala Desa?
Songon dia do tahe acara pelantikan i?
b. gabe ise do ibana digoari dung dilantik?
c. Hea do diida ho acara pandidion ni gareja?
d. Baritahon ma jolo taringot tu na niidam jala patorang ma jolo aha na binegem sian isi ni Agenda na jinaha ni na mandidihon i.
314. Antong aha do Pandidion na Badia i?
Alus : Ia Pandidion na Badia i, parhitean ni asi ni roha ni Debata do i tu jolma. Ai marhitehite Pandidion i sahat do tu na porsea i hasesaan ni dosa, hatutubu paduahalihon, haluaon sian hamatean dohot sian sibolis jala daptan hasonangan na salelenglelengna.
Jaha : Ul. 2:41; 10:48; 16:33; Rom 6:4; 1 Kor. 10:1-4; Titus 3:5; Heb. 11:29; 1 Petr. 3:21

LAPATAN NI PANDIDION I DOHOT PANDOK NI DEBATA

315. Pajojo ma jolo lapatan ni pandidion i dohot pandok ni Debata.
316. Aek do dididihon tu na tardid i, alai holan aek sambaing do i tahe?

Alus : Ndang holan aek sambing i, alai aek na marsaor Hata ni Debata do i, ai tona ni Debata do umbahen na binuat aek i.

317. Sian dia do itaboto, na tutu do 'Ulaon na Badia' pandidion i?

Alus : Sian on do: Tuhan Jesus do mamatikhonsa, disi do bagabaga ni Debata taringot tu asi ni rohana, na naeng lehononna marhite sian i, disi do dohot parhitean ni asi ni rohana i.

Apil : Mat. 28:19; Mark. 16:16; Ul. 2:38

ULI SIAN PANDIDION I DOHOT BAGABAGA NI DEBATA

318. Pajojo ma jolo uli sian Pandidion na Badia i dohot agabaga ni Debata.

319. a. Aha do goar ni uli sijaloon ni angka pejabat na hona` lantik i?

b. Beha do ibana molo unduk jala molo so unduk di janji nijanjihonna i.

320. Laos songon i do na tardidi i, aha do uli sijaloon nasida sian Pandidion na Badia i?

Alus : Hasesaan ni dosa, haluaon sian hamatean dohot sian sibolis dohot hasonangan salelengna.

321. Molo songon i, ndang be mardosa angka naung tardidi?

Alus : Mardosa dope nasida, alai gogo ni dosa dohot upa ni dosa, ndang jumpang be di nasida.

Jaha : Rom. 6:3:11

322. Antong molo songon i, ndang be mate angka naung tardidi i?

Alus : Mate do nian, alai gabe malua nasida sian biar mida hamatean i.

Jaha : 1 Kor. 15:55-57; Rom 6:23

Apil : Pil. 1:21

323. Songon dia do na nidokna dapotan haluaon sian sibolus marhitehite pandidion i?

Alus : Ala naung mardomu hita dohot Debata ndang be margogo sibolis mangago hita jala nunga dipaunsat hita sian gomgoman ni sibolis tu gomgoman ni Debata.

Jaha : Kol. 1:13

324. Ise do na dapotan hasonangan na salelengna, marhite pandidion i?

Alus : Na porsea di Hata ni Tuhanta dohot di bagabagana.

325. la angka posoposo ndang tarbahren dope porsea, antong beha do taringot tu pandidion na jinalonasida?

Alus : tong do pandidion na jinalonasida, ai ndang haporseaon ni jolma mambahren pandidion, Hata ni Debata do na mandokhon mangulahonsa. Ala ni i dung lam marroha nasida ingkon diguruhon Hata ni Debata jala ingkon nasida sandiri manghajongjonghon haporseaonna.

PANGALAHU NI AEK I MANGHORHON ULAON NA GODANG

326. Pajojor ma jolo beha do tahe pangalaho ni aek i ymbahren dihorhon i ulaon na sai godang.

327. a. langgo datu sai na paototohon do ulaonna. Molo mangubati dohot aek rupani sai dibahren do tabasna, i ma hata na so niantusan manang hata sipaototo mandongani aek i.

b. Alai ianggo aek pandidion i, beha do tahe?

328. Aha do na mandongani aek pandidion i?

Alus: Hata ni Debata do.

329. Antong ala ni aha do umbahren dihorhon pandidion i ulaon na sai godang?

Alus : Aa ni Hata ni Debata do, i ma tona ni Tuhan Jesus dohot bagabagana na mandongani aek i dohot ala ni haporseaon ni na tardidi i.

Jaha : Mat. 28:19; Mark. 16:16

330. Na gabe aha do aek i, molo mardongan Hata ni Debata aek i?

Alus : Na gabe pandidion do i, mandok : Aek hangoluan paimbaruhon hatutubu honorhon ni Tondi Porbadia.

Jaha : titus 3:5-7

331. Aha do lapatan ni hatutubu na imbaru manang tubu paduahalihon?

Alus : Munsat sian anak nirmasanna hian gabe anak na niasian, jala partondi na mate hian gabe partondi na mangolu.

Ulaon ni Debata do i di bagasan roha ni pardosa i, ndang ulaon ni jolma i.

Jaha : 1 Joh. 3:1-2

Apil : Gal. 3:26

332. Ise do patupahon gabe tarida di ngolunta naung tubu paduahalihon hita?

Alus : Debata do na patupahonsa, ai Ibana mangula dibagasan rohanta, marhite Tondi Porbadia.

333. Songon dia do hataridaan ni naung tubu paduahalihon?

Alus:

a. Lam ganda gogona mangalao nasa hajahaton dohot burjuna mangulahon lomo ni roha ni Debata.

Jaha : Ep. 4:23-24; 1 Joh. 5:18

b. Marsihohot di haporseaonna jala sumurung dibagasan ulaon ni Tuhan i.

Apil : 1 Kor. 15:58

LAPATAN NI NA MANDIDI

334. Pajojor ma jolo lapatan ni na mandidi.

335. Molo dung dilantik sadasada halak tu ulaon na imbaru, tontu ingkon bolongkononna manang auponna do angka hasomalanna na roa hian, asa tau ibana diulaon i.

Angka hasomalan dia ma i tahe?

336. Aha do ia siaupon ni rohanta ganup ari di ngolunta asa gabe jolma na imbaru hita?

Alus : Pangoloion ni rohanta mangulaohon dosa dohot tangka ni rohanta mangalo Hata ni Debata. Margoar do i, isaranta hian manang jolma na buruk.

Jaha : 1 musa 6:5; 1 Kor. 2:14

337. Marhite aha do i auponta?

Alus : Marhite solsol ni roha dohot marhite na paimbaruhon roha.

338. Songon dia do ngolu ni jolma na imbaru?

Alus : Marroha na ias dohot na tigor.

Jaha : 1 Joh. 3:9

Apil : Rom 6:4

339. Songon dia do hajajadi ni jolma na imbaru?

Alus : Ia jolma na imbaru, i ma naung niurasan ni mudar ni Jesus Kristus na ginoarna tubu paduahalihon marhite panolsolion dohot hamubaon ni roha, i ma naung tubu sian aek dohot sian tondi. Ulaon ni Tondi Parbadia do i, holan na manjangkon do hita marhitehite haporseaon.

Jaha : Joh. 3:3+5+16

340. Antong molo songon i do hape hinabalga dohot hinabagas ni lapatan ni pandidion i, boasa dohot posoposo didion, ai so ciantusi dope i?

Alus :

a. Ala sian sietehetehon ni halak Kristen, naung masuk do nasida tu bangso ni Debata marhite natorasna.

Jaha : 1 Musa 17:10+14; Luk. 2:21

b. Ala bagabaga dohot parpadanan ni Debata, ndada holan tu dakdanak pandidion i alai dohot do tu na magodang.

Jaha : Ul. 2:39

341. Antong, nunga sahat angka dakdanak i tu haluaon holan marhitehite pandidion i?

Alus : Nunga, alai dipangido Tuhan Jesus do haporseaon na togu. Ala ni i, ingkon mardongan haporseaon do pandidion i. Dibahen i tarjou do angka natoras marsuru ianakhonna tu parguruan manghatindanghon haporseaon, asa marhite i boi ibana sandiri manghatindanghon haporseaon. I do umbahen didok muse : “Malua sian pangkangkungion ni natorasna do angka naung manghatindanghon haporseaonna.”

342. Boasa dipamasa pandidion na hinipu?

Alus : Ia Pandidion na hinipu na dipamasa do i tu dakdanak ni halak Kristen, ala targogot siala parsahiton, asa parsidohot ibana di haluaon na pinatupa ni Tuhan Jesus. Sipasahaton do pasupasu tu ibana, di gareja uju masa pandidion, molo hipas do ibana muse.

343. Di do na ginoaranna pandidion na magodang?

Alus : Na dipatupa do i tu halak na magodang, na nionjar ni rohana sandiri, asa gabe halak Kristen, dung jolo mamolus parguruan. Laos di tingki na manghatindanghon haporseaonna i do ibana manjalo pandidion.

paragodunggan.org

PARPADANAN NA BADIA

Dia do lapatan ni na marulaon na badia?

Mangan sagusagu parhitean ni daging ni Tuhan Yesus Keistus dohot minum anggur parhitean ni mudar ni Tuhan Yesus Kristus songon na tinonahonna i tu halak Kristen.

Di dia do tarsurat na songon i?

Songon on do pandok ni si Mateus, si Markus, si Lukas, dohot si Paulus angka na mamaritahon Barita na Uli : Dibuat Tuhan Yesus Kristus ma sagusagu borngin i, uju tarjehe Ibana, didok ma mauliate, dung i diponggoli ma i, diparlehon ma i tu angka siseanna, huhut ma didok : Jalo hamu ma, pangan ma, daginghu do i, na nilehon humophop hamu. Bahen hamu ma songon i bahen parningotanmuna di Ahu. Asa dung sun nasida mangan, dibuat ma panginuman i, didok ma mauliate, dung i ninna ma mandok nasida. Jalo hamu ma, sude hamu manginum sian i. Ia panginuman on, padan na imbaru ma on, hinorhon ni mudarhu na niusehon humophop hamu bahen hasesaan ni dosa. Molo hamu manginum songon i, bahen hamu ma i parningotanmuna di Ahu.

Aha do laba ni na mangan dohot na minum sisongon i?

Dipaboa hata i do labana ai ninna do : Na nilehon humophop hamu dohot na niusehon humophop hamu, bahen hasesaan ni dosa, hangoluan dohot hasonangan marhitehite panganon na badia i. ai ia disi hasesaan ni dosa disi do hangoluan dohot hasonangan.

Hinorhon ni sipanganon dohot siinumon i do na nidokmi?

Ndang na hinorhon ni sipanganon dohot siinumon i, na hinorhon ni hata i do na mandok : Na nilehon humophop hamu, dohot naniusehon humophop hamu, bahen hasesaan ni dosa. Ai angka hata na mandongani sipanganon dohot siinumon i, i do situan ni sipanganon na badia i dung i manang ise na porsea di hata i dapotan hasesaan ni dosa, ai i do pandok ni hata i.

Ise do na manjalo panganon na badia i sian na ture?

Ia na mangontik sipanganon dohot na mangalinggas daging, ruhut na denggan do i nian, alai manang ise na porsea di hata i, na mandok na

nilehon humophop hamu dohot na niusehon humophop hamu bahen hasesaan ni dosa i do na manjalo panganon na badia i sian na ture; alai manang ise na so porsea na ganggu roha, i do na so tau dohot manjalo ai ingkon porsea situtu do roha di hata i na mandok : 'Humophop hamu.'

SUNGKUNSUNGKUN DOHOT ALUS TARINGOT TU PARPADANAN NA BADIA

PARPADANAN NA BADIA DI DIA TARSURAT

344. a. Pesta aha do na nipestahon ni Tuhan Jesus apala parpudi sahali rap dohot angka sisean i andorang so hamamateNa?
b. Aha do dipangan nasida di pesta i?
c. Aha do muse tujuan ni pesta i?
d. Aha do dibuat Tuhan Jesus dung sidung nasida mangan?
345. Parpadanan na Badia do ianggo goar ni ulaon dung parmanganon i, antong aha do Parpadanan na Badia?
Alus : la Parpadanan na Badia, i ma : Mangan roti parhitean ni daging ni Tuhanta Jesus Kristus dohot minum anggur parhitean ni mudar ni Tuhanta Jesus Kristus, asa sehat tu hita hasesaan ni dosa, hangoluan dohot hasonangan.
Jaha : 1 Kor. 11:17-34; Mat. 26; Mark. 14; Luk. 22
346. Pajojo ma jolo aha do lapatan ni na marulaon na badia manang mangan Parpadanan na Badia?
Pajojo ma muse dia di tarsurat na songon i?
347. Ise do na mamatkhon Parpadanan na Badia i, jala sadihari?
Alus : Tuhan Jesus sandiri do, borngin i uju tarjehe Ibana.
Jaha : Mat. 26; Mark. 14; Luk. 22; 1 Kor. 11; Joh. 13
348. Asa aha do dijalo angka na manganhon Parpadanan na Badia i?
Alus : Roti parhitean ni daging ni Tuhan Jesus Kristus dohot anggur parhitean ni mudar ni Tuhan Jesus Kristus.
349. Na muba do roti dohot anggur i gabe daging dohot mudar ni Tuhan Jesus?

Alus : Ndang, hot do roti dohot anggur i, alai parhitean ni daging dohot mudar ni Tuhan Jesus Kristus do i.

LABA NI NA MANGAN DOHOT NA MINUM PARPADANAN NA BADIA I

350. Pajojo ma jolo aha do laba ni na mangan dohot na minum Parpadanan na Badia i?

351. a. Hea do tahe ndang dipasaut Debata bagabagaNa?
b. Porsea do ho di bagabagaNa paboa na adong do laba sian parsidohotonta mandohoti Parpadanan na Badia i?

352. Antong aha do laba sian i?

Alus : Taruli di hasesaan ni dosa, hangoluan dohot hasonangan.

Jaha : 1 Joh. 2:2; Kol. 1:14

353. Ai molo dung taruli do hita di hasesaan ni dosa marhitehite Pandidion na Badia i, pola dope ingkon manganhon Parpadanan na Badia i hita?

Alus : Ala nang pe tardidi hita, sai tong do mangulahi mardosa hita. Dibahen i ringkot pangidoonta hasesaan ni dosa dohot gogo mangalo dosa i marhitehite Parpadanan na Badia i.

354. Dia do lapatan ni na nidokna, 'taruli di hangoluan'?

Alus : Hangoluan ni tondita do na nidokna, paboa marparsaoran hita dohot Ibana. Ai Ibana do mula ni hagogoonta laho patupahon lomo ni rohaNa.

Jaha : Joh. 15:5

355. Dia do muse lapatan ni na nidokna, 'taruli di hasonangan'?

Alus:

- a. Hasonangan ni tondita do na nidokNa, paboa na di lambung ni Tuhanta hita salelenglelengna.

Jaha : Joh. 17:24

- b. Patumonaan ni i, daionta do di tano on. Na gabe pos ni rohanta do i di pangaramotion ni Debata, ai sonang rohanta di manang aha pen a masa tu hita jala pir tondinta mangula siulaonta.

NDANG HINORHON NI SIPANGANON DOHOT SIINUMON I LABA I TAJALO

356. Pajojor ma jolo manang na hinorhon ni sipanganon dohot siinumon i do na nidokna umbahen na tajolo laba i.
357. Asa hata na mandongani sipanganon dohot siinumon i do hape na manghorhon umbahen na tajolo laba i.
- Alus : I ma hata ni Tuhanta na mandok : “Na nilehon humophop hamu dohot na niusehon humophop hamu.”

NA MANJALO PANGANON NA BADIA SIAN NA TURE

358. Pajojor ma jolo ise do na manjalo Panganon na Badia i sian na ture.
359. Boasa ndang boi dope hamu parsidohot tu Parpadanan na Badia i?
360. Antong ise do na boi parsidohot tu Parpadanan na Badia i?
361. Jala songon dia do pangaradeonta laho manjalo Parpadanan na Badia i?
- Alus:
- Paradehon tingki na hohom laho marrujiruji taringot tu dosa na niula huhut manolsolisa.
 - Mamadhanon tu dirinta na sai eahanta marhamubaon ni roha.
 - Manghaporseai Hata ni Debaa dohot BagabagaNa.
 - Mamingkiri dohot mamilangmilangi hahomion dohot hinaarga ni Parpadanan na Badia i, asa gabe partohap hita di haluaon dohot hangoluan na so ra suda, hinorhon ni i.
 - Mardame manang mardenggan dohot na mangarsahi hita.
362. Aha do lumbalumba ni Debata tu angka na marsineang di hahimion ni Parpadanan na Badia i?
- Alus : la Debata, ndang olo lean, ala ni i koras do paminsangon ni Debata tu halak na marsineang manag na marparhamuda hahomion ni Parpadanan na Badia i.
- Jaha : 1 Kor. 11:27-34
363. Antong dia ma siparangehononhon ni halak na naung mandohoti Parpadanan na Badia i?
- Alus:
- Unang be didatdari mardosa.
Jaha : Joh. 8:11; Joh. 5:14
 - Olo manggotaphon nasa hosom ni roha.

Jaha : Mat. 5:23-24; Jak. 5:16

- c. Dipatuduhon parbue ni Tonci di bagasan ngoluna.

Jaha : Gal. 5:22

- d. Dibaritahon holong ni roha ni Debata marhitehite hata, pingkiran dohot pambahenan nang marhite parange pe.

- e. Tama ulahononta i nang tu dongan.

Jaha : Mat. 22:37-40

dargodungan.org

paragodungan.org

HURIA

SUNGKUNSUNGKUN DOHOT ALUS TARINGOT TU HURIA

PENTAKOSTE – MULA NI HURIA

364. a. Aha do na mangonjar roha ni jolma laho pajongjonghon angka kesatuan, isara ni kesatuan ni angka pegawai, buruh di pabrik dohot parumauma?
b. Aha dona mangatur kesatuan i asa boi hot jongjong jala denggan mardalan?
c. Beha do ia taringot tu Huria, jolma do tahe na pajongjonghonsa?
d. Sian nionjar ni panghilalaan ni jolma asa marsada ni roha jala masiurupan do tahe umbahen na jongjong Huria i?
e. Parpungan ni angka ise do tahe Huria i?
f. Ise do ojanan ni Huria i?
365. Antong aha do Huria?
Alus : Ia Huria, i ma parpungan ni angka na porsea di Jesus Kristus, na jonou na pinapungupungu, na pinarbadian, jala pinatongtong ni Debata, marhitehite Tondi Porbadia.
Jaha : 1 Kor. 1:2; 1 Petr. 2:9; Ep. 1:22; 1 Kor. 3
366. langgo Huria i, ndang na jongjong sambing songon i. antong songon dia do tahe mula ni parjongjong ni Huria i?
Alus : Di tingki Pentakoste di Jerusalem gok Tondi Porbadia do angka sisean i, marjamitai ma nasida mardongan huaso. Pola tolu ribu halak na masuk tu HURia di na sadari i. I ma Huria na parjolo di Jerusalem jala partogina i ma si Petrus dohot si Johannes.
Jaha : Ul. 2
367. Songon dia do muse ia ngolu Huria na parjolo i?
Alus : Dibaritahon angka sisean i do Barita na Uli sian jabu tu jabu. Rap martangiang jala rap marulaon na badia do nasida. Disagihon be do artana tu angka na hurangan. Tung sada do tahe rohanasida.
368. Angka bangso dia do tahe na masuk mulamula tu Huta na di Jerusalem i?
Alus : Angka bangso Jahudi dohot na ro sian 16 bangso, nasida ma angka na burju manghangoluhon Barita na Uli i.
369. Alai dipasombu angka halak Jahudi na so porsea i do halak Kristen i?

Alus : Sipata dipaburuburu do nasida. Pola dua hali tarhurung si Petrus dohot si Johannes. Mate do si Stephanus didangguri ala ni jamitana. Garang do muse si Saul mangalelei halak Kristen i.

370. Nandang sadia lelung ditadingkon halak Kristen Jahudi do huta Jerusalem alai disegai halak Rom huta i, gabe di tongatonga ni halak dia do muse marjongongan Huria i?

Alus : Di tongatonga ni halak parbegu do.

HURIA DI TONGATONGA NI HALAK PARBEGU

371. Ala ni pangaleleon na di pulo dia do di Indonesia on ujui, gabe munsat sian i Parbarita na Uli di tongatonga ni bangso Batak parbegu i dope?
Sian kongsi Zending dia do tahe nasida?

372. Ise do partogi ni Huria tu tongatonga ni halak parbegu?

Alus : Apostel Paulus do, ima si Saul pangalele na jolo.

Jaha : Ul. 9

373. Di dia do jongjong Huria i marhite pamarlitahononna di Barita na Uli i?

Alus : Di Asia na metmet – Asia Kecil, Makedonia dohot tano Gorik. Laos di tingki i ma di surat si Paulus 13 suratna tu angka Huria.

374. Songon dia do ngolu ni Huria di tongatonga ni parbegu i?

Torop do halak naung masuk tu ugamo Kristen i. alai mangimburu do Jahudi ala lam moru na marugamo Jahudi, gabe dilelei ma Kristen i dung i ma muse pangaleleon ni panggomi Rom. Hirahira taon 80 dirarang Kesar Rom do hakristenon di tano i jala pola 200 taon lobi lelung ni pangaleleon i.

375. Aha do panghorhon ni pangaleleon i?

Alus : Deba sian halak Kristen i mansoadahon Tuhanna. Nang pe songon i tumorop do na hot marhaporseaon, atik pe ditaon na bernit sahat tu na tarbunu. Pangaleleon i do papitahon Huria i, lam margogo jala lam mangerbang.

376. Alai ujungna mansohot do pangaleleon i, songon dia do pangalaho ni i?

Alus : Dian a laho marporang Kesar Konstantin, didia ibana do ninna sada tanda silang di langit dohot surat na mandok : "Dohot tanda on monang do ho!" Tanda silang i, dipangke ibana ma di angka mandera ni halak Rom

Iaho tu parporangan. Dipasohot ma pangaleleon i di taon 311 jala gabe Kristen ibana.

TINGKI PANONGA

377. Songon dia do siapta ngolu ni partondion ni jolma molo ndang adong hasusaan manang pangaleleon jala makmur ekonomina?

Patorang ma jolo na binotom taringot tusi.

378. Songon dia do ia ngolu ni Huria i dung mansohot pangaleleon i?

Alus : Ianggo sian duru tung manaek do idaon, tamba torop do halak Kristen i laos songon i nang pangulana pe, marjongjongan ma angka gareja. Alal ianggo ruhut parbagasan i ma halason ni partondionta lam sumur do nangetnanget, ai masa do parbolatbolatan na manghorhon parsirangan di Huria.

379. Dia do bonsir ni parbolatbolatan na manghorhon parsirangan di Huria i?

Alus:

- a. Di abad partoluhon dipajongjong angka pangula ni Huria do sada pungan hamalimon, na mamulik sian situan na torop. Lam marhuaso do nasida di angka huta sabungan jala diparenta angka Huria na humaliang.
- b. Di Eropa Parhasudutan, Huria na di huta Rom din a marhuasoan. Torop do angka halak na balga disi songon angka Bishop. Tamba do huasona dung peut harajaon Rom. Ibana ma na manguhuti ulaon ni Apostel Petrus jala marhuaso turu manurun di Huria na di huta Rom.
- c. Bishop Leo 1 na Bolon, i ma Bishop di huta Rom naeng mangahut primat, lapatanna : Ingkon ibana jungjungan ni sandok hakristenon.
- d. Halak Kristen na di Eropa parhabinsaran manjua ma di primat ni Paus na di huta Rom. Jala Bishop na disi ndang hea dapotan huaso nab alga songon na dapot angka Bishop na di Rom.
- e. Ujungna, sirang ma Huria i di taon 1054. Halak Kristen a di Habinsaran maruluan tu Patriack na di konstantinopel jala margoar Huria Khatolik Gorik jala halak Kristen na di Hasundutan margoar Huria Khatolik Rom.

HURIA REFORMASI - PROTESTANT

380. Aha do na targombar di bagasan roham molo dijaha manang dibege ho pandohan Reformasi dohot Protestant?

381. Songon dia do ngolu partondion ni HURia Katolik Rom di tingki i?

Alus:

a. Nunga peut Huria i sian poda ni Barita na Uli na sintong, madabu tu huaso ni Paus dohot angka ulaon hamalimon na sala jala parange ni ruas ni Huria i pe lam lumlam do.

b. Masa ma poda haliluon, i ma parsombaon tu ganaganaan, ulaon missa, ai didok : ganup hali dipelehon Tuhanta i dibagasan missa i, holan roti do lehonon tu ruas ni Huria ndang dohot anggur; dohot ulaon hamalimon na sala, aha na nidok ni Paus, i do na sintong. Sandok tung lumlam do Huria Khatolik Rom i.

382. Dipasombu angka na marhaporseaon di Barita na Uli i do halumlamon i?

Alus : Nandang dipasombu. Huria i ringkot dipatota – direform didok nasida. Dung i, bangkit ma angka reformator di manang piga luat.

383. Nang di tano Jerman pe bangkit ma regormator na tarbarita, ise di goarna?

Alus : Dr. Martin Luther, sahalak monnik na burju jala guru bolon na pistar di Universitas Wittenberg.

384. Aha do mandasdas roha ni Dr. Martin Luther tu ulaon i?

Alus : Panggadisan ni surat aflat manang surat hasesaan ni dosa. Mansai ringkot o hepeng di tingki i pangkeon ni Paus laho pasidunghon gereja Saint Peter di Rom. Ala ni i gabe digadis na sinuruna ma godang surat hasesaan ni dosa. Si Tetzel ma na manggadisi sahat tu huta Wittenberg na di tano Jerman i.

385. Aha do disurathon Dr. Martin Luther di pintu ni gereja Wittenber laho mamprotes aflat i?

Alus : 95 thesis manang ayat sisualon di pintu ni gereja i, di ari 31 Oktober 1517. Laos i ma Ari Reformasi.

386. Beha do panghorhon ni surat protesna i?

Alus:

- a. Tarsunggul ma roha ni sude halak Eropa Parhasundutan mangalo Paus dohot mangihuthon ulaon Protestant na binahen Dr. Martin Luther.
 - b. Hona ban ibana sian Paus, alai ditutung ibana do surat ban i.
 - c. Angka na mangihuthon poda ni Dr. Martin Luther i magoar do Huria Protestant.
387. Dia do apala ojahan ni poda ni Dr. Martin Luther maralohon Khatolik Rom?
Alus:
- a. Hata ni Debata na tarsurat di Bibel i, i do ojahan ni haporseaon.
 - b. Ndang marhite sian angka ulaon na denggan dohot na mangulaon patikpatik dapotan asi ni roha jolma, alai holan marhite haporseaon di Jesus Kristus do dohot asi ni rohaNa.
 - c. Holan dua do Sakramen na tinonahon ni Jesus Kritus, i ma Pandidion na Badua dohot Parpadanan na Badia.

HURIA KRISTEN BATAK PROTESTAN - HKBP

388. a. Aha do goar ni ugamo ni ompunta na parjolo i andorang so ro dope hakristenon?
b. Beha do panghorhon ni i mangihuthon barita na hea binegem?
c. Maol do didok roham dijalo angka ompunta Parbarita na Uli na parjolo i, na ro sian bariba?
389. Molo maol do antong beha do sikap ni ompunta di mulana maradophon angka Parbarita na Uli?
Alus:
- a. Disuru Huria Baptis Inggris do tuan Burton dohot Ward di taon 1824, alai ditulak angka impunta do nasida.
 - b. Kongsi Zending Amerika (Boston) marsuru Pandita Munson dohot Lyman di taon 1834, alai dibunu angka impunta do nasida na dua di Lobupining.
390. Alai ndang dipasombu Debata bangso Batak di bagasan haholomon, disuru Debata do marhite Rheinische Zending Parbarita na Uli na ditulak sian Kalimantan borhat mangula di tano Batak.
Nandigan do mulai mangula Rheinische Zending di tano Batak?

Alus : 07 Oktober 1961, rapot parjolo ni angka Pandita Zending di Sipirok, na laos etongon ari hatutubu ni HKBP.

391. Torop do ujui angka Parbarita na Uli mangula di tano Batak, alai ianggo apala na tarbaritaansian tongatonganasida, ise ma i tahe?

Alus : Dr. Ingwer Ludwig Nommensen. Ibana do Ephotus na parjolo di HKBP na tarpilit di taon 1881. Laos margoar do ibana muse Apostel ni halak Batak.

392. Asa humatop rarat Barita na Uli i, pintor disalin do Bibel i tu hata Batak Toba. Ise do na manalin?

Alus : Pandita P.H. Johasen manalin Buku Padan na Robi, buku Padan na Imbaru disalin Ompu i Ephorus Ingwer Ludwig Nommensen.

393. Dalan pahatophon hararat ni Barita na Uli i, angka ulaon dia do muse diusahahon Rheinische Zending hatop jongjong?

Alus : Ulaon pangajarion dohot ulaon pangubation. Marjongjongan ma angka sikola dohot Rumah Sakit. Hatop do talu haholomon i ala ni angka usaha i.

394. Dung lam rarat Barita na Uli i, parhaladona pe nunga torop sian halak Batak, nunga marjongjongan angka gareja, sikola dohot Rumah Sakit. Gabe tubu ma pingkiran ni halak Batak asa manjungjung baringinna HKBP, unang sai margantung be ngoluna tu Rheinische Zending. Dia do huroha suhatsuhut ni asa bol manjungjung baringinna Huria i?

Alus : Ginoar sada Huria bol manjungjung baringinna molo;

- Huria i (Sinode Godang) mambahen Aturanna.
 - Sian Huria i manang bangso i sandiri parjamitana manang parhaladona.
 - Nasida sandiri mamalenjio angka pangulana.
 - Tau Huria i mangamudihon dirina dohot pahembanghonsa.
395. Ala ni i mamungka sian sadihari HKBP manjungjung baringinna?

Alus:

- Ianggo HKBP mamungka sian taon 1931 nunga mamungka manjungjung baringinna.
- Alai anggo na tangkas, i ma di ari 11 Juli 1940, alai ni porang paduahon i. din a tartangkup angka Pandita ni Rheinische Zending, tangkas ma sian halak Batak angka na manguluhon Huria i, jala ruas ni Huria Batak na mamalanjoisa.

396. Asa maratur Huria i dipahot Synode Godang do aturan ni HKBP. Aha do guna ni aturan ni Huria i?

Alus : Dalan panogunogun do i tu sude ruas dohot parhalado ni Huria patongtonghon tu pangantusion na sntong laho mangoloi Barita na Uli i dohot asa diboto angka parhalado ruhutruhut ni panghobasionna.

397. Laho pasauthon ulaon panindangion, parngoluon, dohot panghobasion ala ni Kristus, dipabangkit do angka goar ni tohonon parhaladoon di HKBP. Aha do ulaonna?

Alus:

- a. Sintua, i ma parhalado na pinilit ni ruas sian ruas ni Huria. Nasida do na mandongani Pandita dohot Guru Huria laho manogunogu halak tu ngolu partondion dohot patureture nasa na ringkot di Huria.
- b. Guru Huria, i ma wakil ni Pandita manguluhon Huria i. siradotan nasida do ulaon parjamitaon dohot pangajarion di Parhalado Huria dohot nasa na sahat tu nasida.
- c. Parjamita Ina, nasida manjalo ulaon sian Pandita Ressort, ojahanna i. parsidohot do nasida manguluhon parmingguon, maragenda dohot manutup pungan marhite pasupasu.
- d. Diakones, i ma angka na manghasuhuthon nasa ragam ulaon asi ni roha na ringkotdi Huria dohot masyarakat, tu na mabalu, na sopot so marama so marina, na pogos, na matua dohot na asing.

Jaha : Ul. 6:1-7

- e. Evangelis, i ma pangurupi gumodang di ulaon parjamitaon, mangebati Huria nambura Kristen manang gale haporseaonna.
- f. Pandita, i ma na manjamitahon Hata ni Debata, manguluhon Sakramen, mangaradoti ulaon partondion di nasa ruas, pasahathon pasupasu di Huria marhite mangampehon tangan. Ibana do partogi ni angka Huria na sahat tu ibana manogihon tu Tuhan Yesus Kristus jala ibana do manogunogu angka pangula di bagianna be songon na tarsurat di Agenda i.

398. Laho paradehon pangulaon ni parhalado i, dipajongjong do inganan parsiajarannasida. Dia ma i tahe?

Alus:

- a. Sikola Guru Huria di Seminar Sipolohon
- b. Sikola Parjamita Ina di Laguboti

- c. Pendidikan Diakones di Balige
- d. Sikola Tinggi Theologi di Pematangsiantar

399. langgo na manjadihon HKBP, i ma angka HURia marsadasada na marpandomuan di Ressort, angka Ressort na marpandomuan di Distrik jala angka Distrik na marpandomuan di Pusat. Patorang ma jolo sadasada angka na tagoari i.

Alus:

- a. Huria marsadasada, i ma parpunguan ni halak Kristen di sada inganan na tontu, na tardidi tu bagasan Goar ni Debata Ama, Anak dohot Tondi Porbadia. Nasida diuluhon Pandita, Guru Huria dohot Parhalado ni Huria.
- b. Ressort, i ma hadomuan ni manang na piga Huria na niuluhon ni Pandita Ressort.
- c. Hadomuan ni manang na piga ressort, i ma na margoar distrik.
- d. Hadomuan ni sude Huria, Ressort, dohot Distrik, Ephorus do na manguluhon, na markantor Pusat di Pearaja-Tarutung.

400. Laho pasauthon panjouon ni Huria patanakhon ngolu hakristenon di sude ruas ni HKBP di panindangion di tongatonga ni HURia dohot masyarakat, hambat tu ulaonna be, gabe dipajongjong do angka Departemen di HKBP. Dia ma goar ni angka Departemen i?

Alus:

- a. Departemen Zending
- b. Departemen Diakoni Sosial
- c. Departemen Ina
- d. Departemen Naposobulung
- e. Departemen Sekolah (DPP)
- f. Departemen Perusahaan
- g. Departemen Sikola Minggu
- h. Departemen Dana Pensiun
- i. Departemen Kesehatan

401. Antong aha do sitiopon ni rohanta songon ruas ni HKBP?

Alus:

- a. Asa gabe ruas ni Huria, i ma angka naung manjalo Pandidion na Badia.

- b. Na bertanggungjawab do ganup ruas ni Huria i manarohon na ringkot di haporluan laho pamajuhon Huria i marhitehite pelean, guguan dohot na asing.
 - c. Ringgas ro tu parmingguan, tu angka parpunguan na manaringoti Hata ni Debata di Huria i dohot Ulaon na Badia. Songon i tu ragamragam ni ulaon hapanditaon dohot Departemen.
 - d. Umur 13-20 taon patut mamasuhi parguruan manghatindanghon haporseaon.
 - e. Na boi manjalo pasupasu parbagason, i ma angka naung manghatindanghon haporseaon jala denggan parhuriaonna.
 - f. Na boi marulaon na Badia, i ma angka naung manghatindanghon haporseaon jala ndang hona pinsang ni Huria.
 - g. Boi do dijanghon mulak tu Huria angka na hona pinsang dung jolo marguru manopoti.
 - h. Patut do hita hona pinsang (hona ban) molo taulahon na maralo tu Hata ni Debata dohot Aturan ni Huria, jala jaloonta do i dibagasan haunduhon.
402. Molo tataringoti angka goar ni tohongan dohot pajojo ni na manjadihon HKBP, Departemen dohot Lembaga, nunga tardok HURia na sintong HKBP? Dia do tanda ni Huria na sintong?
- Alus:
- a. Molo polin dipodahon Barita na Uli
 - b. Molo sintong diulahon Sakramen na dua i songon na niaturhon ni Tuhan Jesus.
 - c. Molo dipamasa ruhut paminsangon mangotapi angka dosa.
403. Songon ruas ni Huria hita godang do angka ulaon haholomon na boi managai haporseaonta. Dia do goar ni buku na gabe sitiopon ni rohanta laho manjaga hapolinon ni haporseaonta?
- Alus : Buku Panindangion Haporseaon (Confessi) ni HKBP.

paragodunggan.org

PANGUJUNGI

404. Nunga marujung parguruanta, antong aha do sitiopon ni rohanta sian saluhutna i?

Alus:

- a. Hata ni Debata do arta na umarga i.
- b. Parsaoran na salelenglelengna dohot Debata Ama, Anak dohot Tondi Porbadia, i do situjuon ni rohanta.
- c. Hamubaon ni rohanta marhitehite haporseaon di Tuhanta Jesus Kristus, i do siringkotan ni rohanta gumodang.

Apil : a. 1 Joh. 2:18

b. Sai tiop ma i

405. Aha do lapatan ni angka ayat sijaloonta di na manghatindanghon haporseaonta hita di Gareja?

Alus:

- a. Nandang todung taringot tu parsorion dohot pangalahonta i. Bohalta do i sian Hata ni Debata, sitiopan ni rohanta jala sipagandaonta marhite na mandatdati manjaha Hata ni Debata dohot mangguruhonsa.
- b. Siparateatehononta jala sihangoluhononta do i saleleng hita mangolu songon ayat patujolo sian Hata ni Debata na gae sulusulu ni patta jala hatiuron ni dalanta.

Apil : Psl. 119:105 : 'Hatami do sulusulu ni pathu jala hatiuron ni dalanku.'